



Bai yu mekim planti moa skon na kamapim moa moni

Mekim ol skon bilon maket wantaim flour ol trupla lain bilong bakeri save usim



Gutbai Gavana Agiru...

Polye: Mi ting gavman i rausim mi - P3

Kasket bilong Gavana Agiru...Ol ami i karim kopin bokis bilong Hela Gavana Anderson Agiru i go insait long Sir John Guise Stadium long Pot Mosbi long asde. Moa long 10, 000 manmeri bilong Hela na Sauten Hailans i stap long Pot Mosbi i bin kam long dispela haus kraik. Praim Minista Peter O'Neill, Oposisen Lida Sam Basil na Sif Jastis Sir Salamo Injia wantaim planti ol gavman minista, memba, provinsal gavana na ol bisnis lida i bin kam long dispela las haus kraik long Pot Mosbi. Ol bai i kisim bodi bilong Gavana Agiru i go long Mendi, Sauten Hailans tete. Long 1 klok apinun, bodi bilong Gavana Agiru bai lusim Mendi na i go long Tari, Hela Provins, we tausen manmeri Hela i wetim bodi bilong namba wan pikinini man na lida bilong ol.

O'Neill toktok long yuni sumatin

PRAIM Minista Peter O'Neill i laikim olgeta sumatin long tripela yunivesiti long PNG long go bek long skul.

Mista O'Neill i tok edukesen em i namba wan samting long laip bilong ol yangpela manmeri, na em i les long lukim ol sumatin i lusim skul na raun nating long skul graun o ausait long strit.

Mista O'Neill i autim dispela toktok asde long tok save long ol sumatin bilong Yunivesiti ov PNG (UPNG), PNG Yunivesiti ov Teknoloji

(Unitech) na Yunivesiti ov Natural Risos na Environmen (UNRE) olsem ol i mas putim skul bilong ol i go pas long laip.

"Mi gat bikpela rispek long ol sumatin bilong dispela kantri. Mi luksave long ol raits bilong ol long sanap strong na toktok long ol nesanel isu o samting bilong dispela kantri," Mista O'Neill i tok.

Tasol em i tok ol yuni sumatin husat i nau les long go skul na i laikim em long go

toktok wantaim polis frod skwat, i mas tingting gut pastaim.

"Tingting gut pastaim bikos mi bin stap sumatin olsem yupela na kamapim dispela kain protes. Long taim bilong mi, mi no bin save olsem sampela manmeri long ausait i bin yusim mipela long sanap na toktok.

"Nau dispela ol samting we yupela i toktok long en i stap pinis long kot. Kot i wok long skelim i stap.

I go moa long pes 2...

Everyone is a winner on the friendlier network

Buy and activate a new SIM and get a **FREE Day Pass**.

LIMITED PERIOD OFFER

FREE Day Pass

5 mins voice
Any network in PNG

+

5 sms
Any network in PNG

76003555 or 1555
connect@bmobile.com.pg
www.bmobile.com.pg

Sir Peter givim tok lukaut long Enga sumatin

OL yuni sumatin bilong Enga Provins i no ken westim taim na joinim ol arapela sumatin long kirapim protes egensim gavman, Gavana Sir Peter Ipatas i tok.

Sapos ol yuni sumatin bilong Enga husat i stadi long Yunivesiti ov PNG, PNG Yunivesiti ov Teknoloji na Yunivesiti ov Nesural Risos na Envaironmen (UNRE) i sakim tok bilong Sir Peter, ol bai lusim sponsasip bilong Enga Provinsal Gavman.

Sir Peter i mekim dispela toktok las wik taim em i bin go long Yunivesiti ov PNG (UPNG) long stopim ol sumatin

long protes egensim Praim Minista Peter O'Neill.

Ol sumatin bilong tripela yunivesiti, em UPNG, Unitech na UNRE, i wok long protes egensim Praim Minista Peter O'Neill.

Ol sumatin i laikim Mista O'Neill long go daun long opis bilong Frot Skwat na larim ol i intaviuim em. Tasol Mista O'Neill i les long go daun bikos em i tok olgeta dispela samting i stap long kot na kot yet bai stretim ol samting.

Sir Peter i tok em i laikim ol sumatin bilong Enga Provins long skul na ol i no ken westim

taim long protes.

"Namba wan samting mi laikim ol sumatin bilong Enga long save olsem dispela gavman bilong Praim Minista Peter O'Neill i luksave gut tru long provins bilong yumi," Sir Peter i tok.

Em i tok pastaim ol gavman na praime minista bipo i no save wok gut wantaim Enga Provins tasol gavman bilong O'Neill-Dion i wok long mekim planti gutpela samting bilong Enga.

"Insait long 20 yia mi stap long Palamen, no gat wanpela gavman i save harim kra i na sin-

gaut bilong ol pipel bilong Enga, tasol dispela gavman em i gavman bilong Enga.

"Praim Minista em i wankain olsem yupela. Ol samting we em i asua long en, em olgeta samting i stap long kot.

"Yumi gat kot sistem long stretim ol dispela samting. Yupela ol sumatin i lida bilong dispela kantri long bihain taim.

"Mi laikim ol Enga sumatin long go bek long skul na no ken westim taim na kamapim protes. Bai yupela i raus long sponsasip bilong provinsal gavman," Sir Peter i tok.

O'Neill tok em i no kisim wanpela toea

PRAIM Minista Peter O'Neill i tok em i no bin kisim wanpela mani long Paul Paraka Loyas.

Mista O'Neill i tok ol Polis Frot Skwat na Investigesin Task Fos Swip i no gat evidens long soim olsem em i bin kisim wanpela toea.

Mista O'Neill i autim dispela toktok taim ol sumatin long tripela yunivesiti long Yunivesiti ov PNG (UPNG), PNG Yunivesiti ov Teknoloji na Yunivesiti ov Netural Risos na Envaironmen (UNRE) i singaut strong long em i larim Polis Frot Skwat i intaviuim em.



PRAIM Minista Peter O'Neill

Tasol Mista O'Neill i tok dispela olgeta tok tok i stap nau long kot na em i askim ol

sumatin long rispektim kot.

"Mi tokaut pinis. Mi no kisim wanpela toea long Paul Paraka. Kot i wok long sekim dispela nau yet," em i tok.

Mista O'Neill i askim ol sumatin long rispektim wok bilong kot na larim kot i mekim disisen.

Em i autim dispela toktok long Mande dispela wik taim ol yunivesiti sumatin i toktok strong lusim skul bikos ol i laikim

Praim Minista long larim polis frot skwat i toktok long em.

O'Neill: Wetim taim bilong ileksen

PRAIM Minister Peter O'Neill i strongim sait long stap yet olsem bos bilong kantri na em i les long lusim sia bikos ol pipel na Palamen i bin makim em i kamap Praim Minista bilong PNG.

Mista O'Neill i tok em i ples klia planti manmeri i bin laikim em i kamap Praim Minista na ol i bin makim ol memba husat i bin ran long ileksen long yia 2012 aninit long Pipols Nesanel Kongres (PNC) Pati.

Aninit long lo, Gavana Jeneral i save askim politikel pati we i gat bikpela namba long kamapim nupela gavman.

Long yia 2012, Gavana Jen-

eral Sir Michael Ogio i bin askim Pati Lida bilong PNC Pati, Peter O'Neill, long kamapim nupela gavman bikos politikel pati bilong em i bin gat bikpela namba bilong kendidet husat i bin winim ileksen aninit long PNC.

Long dispela as, Mista O'Neill i tok em i les long risain o lusim sia bikos ol pipel yet i bin makim em i kamap lida bilong dispela kantri.

Toktok bilong em i go long ol arapela manmeri na ol yunivesiti sumatin, husat i laikim em long risain em olsem, "mi bai no inap lusim sia bilong Praim Minista sapos ol yuni sumatin o sam-

pela ol sivil sosaiti grup i tokim em long risain."

Mista O'Neill i tok em bai no inap risain na lusim sia bikos olgeta asua bilong em i nau stap long kot na ol manmeri i mas sapotim kot.

Em i tok as tru bilong ol man i laikim em long risain em i ol samting we ol jas bilong nesenel kot na Suprim Kot i wok long lukluk long en.

"Dispela ol toktok i stap pinis long kot, na mi rispektim kot. Mi no wanpela raskol man o man bilong brukim lo.

"Mi Praim Minista bilong dispela kantri. Mi rispektim kot na larim dispela olgeta samting i stap long kot.

"Kot yet bai stretim ol samting na sapos kot i painim aut olsem mi asua, orait em mi asua pinis ya na bai mi bihainim laik bilong kot tasol.

"Tasol sapos wanpela man o meri i laikim mi long lusim sia bilong Praim Minista, em i mas save olsem ol pipel bilong dispela kantri i makim mi kamap lida," Mista O'Neill i tok.

Em i tok yumi mas rispektim wok bilong kot na larim kot i mekim disisen long dispela bikos nau yet olgeta dispela hevi i stap long han bilong kot na ol jas i wok long lukluk long dispela ol samting.

O'Neill: Somare na Morauta no ken tanim gutpela man

TOKTOK bilong Gren Sif Sir Michael Somare long askim Praim Minista Peter O'Neill long lusim sia na risain i no kam gut.

Praim Minista O'Neill i tok Sir Michael i mas lukluk gut long em yet pas-taim long em i mekim kain ol toktok egensim em.

Mista O'Neill i tok Sir Michael i bin resis stret long rausim gavman bilong O'Neill taim em i kisim pawa long yia 2011.

Sir Michael i laikim Mista O'Neill long risain na lusim sia bilong Praim Minista bikos nem bilong em i bagarap pinis taim em i les long daunim em yet na larim ol frot skwat i toktok long em.

Dispela ol samting i nau stap long kot yet na i no gat wanpela disisen i kamap yet.

Mista O'Neill i tok taim dispela hevi bilong em i stap yet long kot, Sir Michael i mas rispektim kot na i no ken mekim dispela kain toktok taim kot i no mekim wanpela disisen o kot i no painimaut yet wanpela asua.

"Mi wok long toktok yet. Soim wanpela evidens olsem mi bin kisim sampela mani long dispela Paul Paraka Loyas peimen. Mi bai risain na lusim sia bilong Praim Minista sapos kot i painimaut olsem mi bin kisim

sampela mani long dispela peimen," Mista O'Neill i tok.

Mista O'Neill i tok nau yet em bai no inap risain bikos Sir Michael na Sir Mekere i no gat wanpela gutpela tingting long rausim em na givim wanpela gutpela samting long pipel bilong dispela kantri.

"Sapos tupela man i ting tupela i gat sapot bilong ol pipel long makim ol na kamap lida, orait tupela i ken bungim han na sapot wantaim na ran long ileksen 2017.

"Tasol no gat wanpela manmeri bai amamas long makim tupela i kamap lida. Sir Mekere i lus long 2002 na Sir Michael i lus long 2012.

"No gat wanpela manmeri bai votim tupela i kamap praime minista. Ol pipel i givim pawa long mi long 2012 ileksen," Mista O'Neill i tok.

Sir Mekere i bin tok Mista O'Neill i bagarapim sia bilong Praim Minista bikos em i gat planti ol alegesen o sut toktok i stap egensim em.

Sir Mekere i tok long larim nem bilong opis bilong praime minista i stap gut, Mista O'Neill i mas lusim sia na risain.

Em i tok O'Neill i mas bihainim kot na larim ol frot skwat i toktok long em.

I kam long pes 1...

O'Neill toktok wantaim ol Yuni sumatin

Na kot bai mekim disisen. Mi rispektim wok bilong kot," Mista O'Neill i tok.

Em i tok gavman i putim edukesen i go pas na kamapim fri edukesen polisi. Dispela polisi i helpim planti papamama.

"Mi bin skul long ples long Pangia na kam long yunivesiti. Sampela manmeri i no bin gat sans long kam skul long yunivesiti.

"Mi bin gat sans long kisim save na kamap lida. Yupela tu i gat sans long kam skul long yunivesiti na kisim save, we dispela save bai helpim yupela long kamap lida bilong dispela kantri long bihain taim.

"Namba wan samting long laip bilong yupela em long go insait long klasrum na kisim save. Gavman i kirapim nupela haus bilong slip long UPNG bikos em i laikim ol

sumatin long slip gut na skul gut.

"Dispela gavman i luksave long sumatin bilong PNG. Mi laik askim olgeta sumatin long go bek long skul na larim kot i mekim wok," Mista O'Neill i tok.

Long wankain taim, SRC bilong UPNG i no bin holim vot we ol i bin tok long holim long asde bikos lilektoral Komisn i tok ol i no redi long holim dispela vot.

Sampela toktok i kam long ol sumatin i bin tok olsem ol UPNG SRC i bin go lukim lilektoral Komisn long Tunde dispela wik long kisim tok orait bilong Komisina long ol sumatin bai kisim bot long ol i mas holim yet protes na pasim ol klas o no gat.

Tasol long Trinde, asde ol SRC eksekutiv i tokim ol

sumatin olsem vot bai i no kamap bikos ol lilektoral Komisn i tok ol bai mas mekim klia sampela lo aninit long ekt pastaim.

Tasol ol i givim tok orait long ol SRC i ken go het na wokim referendum bilong ol yet.

Ol sumatin nau i wokim ol kem ausait long ol domitori long ol rijonal grup na paitim toktok i stap. long wankain taim ol akademik senet i givim wanpela moa wik long ol sumatin long stap na ol i mas go bek long ol klas.

SRC na ol sumatin asde i tok bai ol i bungim mani long haia long ol kar long karim ol raun na givim aut toksave long olgeta pablik long wanem as ol i wok long holim stopim klas protes inap long taim Praim Minista

bai lusim sia bilong em.

Ol lida bilong SRC i tok, as bilong ol i laikim Praim Minista long lusim sia bilong em, i bikos ol i no laikim nem bilong sia bilong Praim Minista bai bagarap.

SRC Presiden i tok em i no wanbel long pasin ol sumatin i wokim long taim ol i kukim ol niuspepa bilong bikpela niuspepa kampani long las wik. Em i tokim ol sumatin long ol i mas mekim pasin olsem ol saveman na i no olsem ol longlong man.

Inap long asde, ol sumatin i no laikim ol biknem niuspepa, televisen na redio stesin we i gat nem wantaim ol gavman long go insait long yunivesiti na kisim nius stori bilong ol. Ol larim ol praivet media kampani tasol long go insait.

Polye: Mi ting Gavman i rausim mi

SASPENDEN Oposisen Lida, Don Polye, i ting olsem gavman i wok long mekim ol samting long rausim em bikos em i bin strong tumas long toktok egensim gavman.



Don Polye

Mista Polye i no bin maus pas olsem arapela ol pastaim Oposisen Lida tasol em i kamap wanpela paia lait lida na trupela Oposisen Lida long sanap strong na toktok long planti ol samting i no stret long kantri.

Mista Polye i lusim sia bilong Oposisen Lida las wik bihain long Nesenel Kot i painimaut olsem sampela moa balot bokis bilong Kandep ilektoret i stap yet.

Nesenel Kot i painimaut olsem ol wokman bilong Ilek-

gen ol balot pepa bilong Kandep.

Mista Polye i tok dispela ol balot bokis we ol wokman bilong Ilektral Komisn i no bin kautim i gat 3,294 vot, tasol em i bin winim sia bilong Kandep Open wantaim moa long 12 tausen vot.

Mista Polye i tok 4-pela yia i go pinis taim em i winim dispela ileksen wantaim moa long 12 tausen vot na taim 11-pela mun tasol i stap long rit bilong ileksen 2017 i kam aut, kot i mekim dispela disisen long kaunim gen dispela ol balot pepa.

Em i sutim toktok long ol ileksen opisal i mekim sampela wansait wok long bihainim laik bilong gavman

bikos em i bin autim planti samting we gavman i asua long en.

"Mi bin sanap strong na toktok strong egensim pasin korapsen, stopim ol lida i no ken stilim mani bilong pipel, na larim yumi olgeta i bihainim lo bilong kantri.

"Mi bin mekim dispela wok long nem bilong pipel bilong dispela kantri na planti ol man na ol gavman minista i bin kisim bikpela bagarap na painim hat long mekim stil pasin," Mista Polye i tok.

Las wik, tupela opisal bilong Ilektral Komisn husat i go pas long Kandep, i go long han bilong polis we wok painimaut bai kamap long sekim wok bilong tupela.



Wantok fail foto i soim Hela Gavana Anderson Agiru (namel) wantaim Praim Minista O'Neill, Gren Sif Sir Michael Somare na bipo ExxonMobil PNG Menesing Dairekta Peter Graham i katim ket long komisnin PNG LNG Projek long yia 2014.

PNG LNG Projek hanmak bilong Agiru

DISPELA bikpela ges projek long kantri yumi kolim PNG LNG Projek bai no inap kamap na PNG inap long abrusim ol gutpela benefit long dispela K43 bilien projek sapos Hela Gavana Anderson Agiru i no bin stap.

Memba bilong Koroba-Kopiago, Philip Undialu, i mekim dispela toktok asde long haus kra i bilong Gavana Agiru long Sir John Guise Stadium long Pot Mosbi.

Dispela i bin las haus kra i bilong Gavana Agiru long Pot Mosbi. Bodi bilong Gavana Agiru i lusim Pot Mosbi long tude (Fonde) long 5 klok moning na bai go pundaun long Mendi na Tari.

Mista Undialu, husat i siaman bilong ogenaisig komiti bilong haus kra i, tok Australia inap long kisim ges bilong yumi go na kamapim LNG Projek long Gladstone, Queensland, Australia.

"Mista Agiru i bin les long ges bilong PNG i go long narapela kantri. Em i bin stopim PNG Gas Projek we gavman bilong Australia i bin laik long pulim ges i go long paipain long Queensland.

"Sapos Gavana Agiru i no bin stap, PNG LNG Projek bai no inap kamap. Em i bin pait strong na stopim PNG Gas Projek.

"Em i winim pait na kamapim PNG LNG Projek. Nau yumi lukim bikpela ges projek i stap long PNG. Olgeta benefit bai stap long PNG na gavman na manmeri bai kisim moa benefit long bihain taim.

"Sapos Agiru i no bin stap, PNG LNG Projek bai no inap kamap. Em i stap na LNG projek i kamap. Dispela projek em i wanpela bikpela han mak bilong em," Mista Undialu i tok.

Sensosip Enfosmen divisen rausim ol iligel samting

ENFOSMEN Divisen bilong Opis bilong Sensosip i bin rausim 81 Dijital Vidio Disk (DVDs) long wanpela stua, (haitim nem) we i stap insait long Food World soping senta long Tunde 3 Me, 2016.

Ekting Senia Enfosmen Opisa, Gereia Kapa i tokaut olsem ol i bin kisim 81 DVD bilong dispela stua we ol i bin wok long salim gen ol DVD na i go gat klasifikesen tiket bilong Opis bilong Sensasip i stap long ol.

Mista Kapa i tok, Rapid Fon i save mekim wok bisnis bilong en aninit long wanpela Pablikesen Premises kampani, na ol i gat rejista bilong salim ol DVD long ol kastoma, tasol ol dispela DVD we i bin stap long ples klia em i no gat klasifikesen tiket bilong Opis bilong Sensasip.

Ekting Menesa bilong Komplaiens na Operesens Divisen, Bais Buchanan i tok bikos long mani i sot, opis i no inap long mekim gutpela inspeksen long ol ples we ol i salim ol pablikesen.

Tasol, em i tok olsem pablikesen ples i gat wok long ol i mas bihainim ol lo na ol i mas



Sensasip Opisa lukluk long ol DVD we i no gat mak bilong Sensasip Opis long wanem klasifikesen bilong ol piksa i stap insait. Foto: Sensasip Midia.

rejista na kisim stret ol klasifikesen bilong Opis bilong Sensasip.

Mista Buchanan i tok tu olsem i gat wanpela bung operesen em ol i plen long holim

long namel bilong yia wantaim ol polis na PNG Kastoms opis.

Long wankain operesen las wik, Mista Buchanan i tokaut olsem moa long 30 kain sam-

ting bilong ol manmeri i wokim pamuk pasin i stap we ol i bin kisim long Famesi long Water Front, na ol i wet long bagarapim na pinisim ol dispela samting.



We have knowledge, history, experience and a commitment to PNG like no other financial institution.

We share a common bond - our culture, our community, our people.

Knowing that united we will be successful. Wherever you live, we know you, and we are there for you. After all PNG is our home – We are PNG, We are you.

LIVIKONIMO KOKI
BSP GOROKA BRANCH MANAGER
20 Years with BSP Bank



www.bsp.com.pg 

WE ARE BSP

Bai ileksen bilong Hela provinsal sit bai kamap bihain

BAI ileksen long makim nupela lida long kisim ples bilong Gavana Anderson Agiru bilong Hela Provins bai no inap kamap hariap, Ilektoral Komisina Patilus Gamato i tok.

Mista Gamato i tok Ilektoral Komisina bai mekim disisen bihain long wanpela mun na tokaut long bai ileksen bilong Hela provinsal sia.

Sia bilong Hela provinsal memba i nau stap natin bikos Gavana Anderson Agiru i dai long Epril 28.

"Ating bai ileksen bilong Hela provinsal sia bai kamap bihain taim. Nau yet mipela i luksave olsem Hela pipel i

stap long haus kra i bilong lida bilong ol, Gavana Agiru, husat i dai.

"Ilektoral Komisina i rispek-tim dai bilong Gavana Agiru, na mipela bai larim wanpela mun i go pastaim.

"Taim ol i planim pinis Gavana na haus kra i pinis, mipela bai tok save long taim na de bilong bai ileksen," Mista Gamato i tok.

Gavana Agiru em i kamap namba wan gavana bilong Hela Provins long yia 2012 i kam inap em i dai tupela wik i go pinis.

Long mun Desemba, Memba bilong Komo-Margarima Francis Potape i bin yusim ol memba bilong Hela

Provinsal Asembli long muvim wanpela mosen long rausim Gavana Agiru, na makim Potape i kamap nupela gavana.

Dispela taim Gavana Agiru i bin sik no gut tru na em i bin stap long haus sik long Saina.

Provinsal mejistret Vincent Eralia i bin luksave long dispela pasin we memba bilong provinsal asembli i bin makim nupela gavana.

Tasol Agiru i bin salensim dispela mosen ov no konfidens na ileksen bilong Mista Potape long Nesenel Kot long Waigani long mun Janueri dispela yia.

Nesenel Kot i bin luksave

long Agiru olsem gavana bilong Hela tasol Mista Potape i bin apil na skruim gen long larim Suprim Kot i sekim gen sapos ol memba bilong provinsal asembli i bin bihainim stret lo long rausim Agiru na makim em i kamap nupela gavana.

Klostu long kot i laik mekim disisen long dispela keis, Gavana Agiru i bin lusim laip bilong em long Pot Mosbi.

Em i dai long 7 klok moning long Pot Mosbi long Fonde 28 Epril 2016.

Ol dokta i tok leit gavana Agiru i bin gat sik long kidni bilong em. Long taim em i bin dai, krismas bilong Agiru i bin 54 yia.

Mani stap long graun, i no long oil na ges

PLANIM kaikai na wok long graun bikos mani em i stap long graun.

Mani i kam long oil na ges bai pinis tasol mani i kam long kaikai ol manmeri i planim long graun na salim bai no inap pinis.

Dispela em i las toktok bilong Hela Gavana Anderson Agiru taim em i bin stap long haus sik long Beijing long Saina.

Brata bilong em, Vincent Agiru, i autim dispela toktok asde long haus kra i bilong Gavana Agiru long Sir John Guise Stadium, Pot Mosbi.

Dispela i bin las haus kra i bilong Hela Gavana Agiru, husat i bin dai long Epril 28 long Pot Mosbi.

Vincent i tok Gavana Anderson Agiru i bin laikim ol manmeri Hela long planim kopi diwai, lukautim pik na kakaruk na planim kaikai.

"Wanpela toktok em i bin tok long haus sik long Saina. Gavana bilong yumi i bin laikim ol wan wan man Hela long planim 1, 000 kopi diwai, 100 pik na planim arapela kaikai," Vincent i tok.

Em i tok Gavana Agiru i bin save olsem oil na ges bai pinis tasol graun bai stap yet. Sapos ol manmeri i planim kaikai na lukautim animol long graun, ol bai mekim mani inap ol yet i dai o graun i pinis.

Gavana Agiru i bin kisim sampela man meri Israel long Hela na ol dispela manmeri Israel i lainim ol asples long planim kaikai na mekim wok agrikalisa.



Las toktok bilong Hela Gavana Anderson Agiru taim em i bin stap long haus sik long Beijing long Saina.

Las haus kra i bilong Agiru long Pot Mosbi

LAS haus kra i bilong Pot Mosbi bilong namba wan pikinini man na trupela lida bilong Hela Provins, Gavana Anderson Agiru, i kamap asde long Nesenel Palamen na long Sir John Guise Stadium.

Long 10 klok moning, bodi bilong leit Gavana Agiru i bin go long Nesenel Palamen we ol memba, gavman minista, provinsal gavana na diplomatik ko i bin givim laspela rispek long em.

Long 11 klok, ol i kisim bodi bilong Gavana Agiru i go long Sir John Guise Stadium.

Moa long 10, 000 manmeri Hela na Sauten Hailans husat i stap long Pot Mosbi i bin pulapim indo spot kompleks bilong stedium we ol i bin kamapim haus kra i.

Tupela sait bilong sindaun i bin pulap. Ol Hela na Sauten Hailans i bin sindaun isi, na givim las rispek bilong

ol long Gavana Agiru.

Praim Minista Peter O'Neill, Oposisen Lida Sam Basil, Palamen Spika Theo Zurenuoc, Sif Jastis Sir Salamo Injia na arapela ol senia gavman minista i bin go long dispela haus kra i.

Ol mausman bilong biknem kampani olsem ExxonMobil na Oil Search tu i bin kam sindaun long haus kra i.

Planti ol poroman bilong

Gavana Agiru long Israel, Australia na sampela ol ovasis kantri tu i bin kam long soim sori na givim las rispek bilong ol.

Dispela em i bin las haus kra i long Pot Mosbi. Bodi bilong Gavana Agiru i lusim Pot Mosbi long Fonde moning na bai go long Mendi, Sauten Hailans, na bihain lusim Mendi na go long Tari, Hela Provins.

Agiru Haiwe em nupela nem long Galp-Sauten Hailans

NEM bilong Galp-Sauten Hailans Haiwe bai senis, Praim Minista Peter O'Neill i tok.

Mista O'Neill i tok nupela nem bilong dispela haiwe bai Agiru Haiwe. Em i tok Mista Agiru i

mekim bikpela wok long Hela, Sauten Hailans na PNG bikos e i bin gat bikpela tingting long kirapim dispela kantri na senisim PNG.

"Gavana Agiru i wanpela namba wan pikinini man bilong PNG, i no bilong yupela Hela na Sauten Hailans tasol.

"Em i save tingim kantri bilong yumi PNG na mekim wok. PNG LNG Projek em i han mak bilong em. Em i laikim ol pikinini bilong yumi long bihain taim i mas kisim benefit.

"Em i pait long larim ol papa graun i kisim bikpela benefit. Mi sori long dai bilong em. Agiru em i wanpela yangpela lida na em i dai long yangpela mak.

"Long tok tenkyu long olgeta gutpe la samting em i mekim long kirapim Hela, Sauten Hailans na PNG, mi laik tokim yumi olgeta olsem nem bilong nupela Galp-Sauten Hailans Haiwe bai senis.

"Nupela nem bai Anderson Agiru Haiwe," Mista O'Neill i tok.

Bodi bilong Agiru bai go long Hela tude

BODI bilong namba wan pikinini man na trupela lida bilong Hela na Sauten Hailans, Anderson Agiru, bai lusim Pot Mosbi na go long Hela na Sauten Hailans tude (Fonde).

Long 7 klok moning, balus sata bai lusim Pot Mosbi na kamap long Mendi, Sauten Hailans we ol manmeri i wet long soim las rispek na tok gutbai long pastaim gavana bilong ol.

Long 8 klok, bodi bai kamap long Mendi taun na ol opisal program bilong haus kra i bai stat long 9 klok moning long Momei Oval.

Praim Minista Peter O'Neill, Palamen Spika

Theo Zurenuoc, Sauten Hailans Gavana William Powi, Memba bilong Imbonggu na Woks Minista Francis Awesa, Mendi bilong Mendi De Kewanu, Memba bilong Kagua-Erave James Lagea, Memba bilong Nipa-Kutubu Jeffrey Komal na arapela minista na memba bai kisim bodi i go long Mendi.

Ol tripela memba bilong Hela, em Memba bilong Tari-Pori na Fainens Minista James Marape, Memba bilong Komo-Margarima Francis Potape, na Memba bilong Koroba-Lake Kopiago Philip Undialu bai go tu.

Long 9 klok i go inap hap pas 9, ol polis na ami bai givim gad ov ona na wanpela open bek kar bai kisim bodi i go long Momei Oval.

Ol gavman minista, memba na wanlain bilong Gavana Agiru bai bihainim kar wantaim bodi i go long Momei Oval.

Long 10 klok i go inap 1 klok apinun, ol pablik bai lukim bodi bilong Gavana Agiru na soim las rispek. Long 1 klok, bodi bai lusim Mendi na go long Tari, Hela Provins, we moa long tausen manmeri bai wetim namba wan pikinini man na trupela lida bilong ol.

TOKSAVE!

Long nambawan de bilong Mun Me (1) 2016, olgeta email etres bilong Word Publishing Company, pablisa bilong **Wantok Niuspepa** bai senis.

Pastaim email etres em:

@wantok.com.pg

Nau email etres em stap olsem:

@wantokniuspepa.com

Toksava, plis salim ol samting i

kam long nupela atres olsem

editorial@wantokniuspepa.com

o jwilson@wantokniuspepa.com

Dispela toksava i kam long Jenerel Menesa bilong Word Publisng Company



Yunaitet Sios i singaut long pre long lidasip bilong kantri

YUNAITET Sios bilong Papua Niugini na Solomon Ailan i mekim tok-tok long wanem samting nau i wok long kamap long kantri, olsem em i wanpela spiritual problem we yumi mas stretim wantaim Tok bilong God.

Asembli Seketeri bilong Sios, Uvenama Rova i makim maus bilong Modereta Bernard Siai long toktok long dispela hevi we i mekim ol UPNG sumatin long ol I stopi klas inap long tupela wik.

Mista Rova i tok, Yunaitet Sios long Papua Niugini i gat wok long lainim, autim gutnius na bihainim pasin bilong Gutnius bilong Jisas Kraus na em i laik lukim ol pipel bilong God i mas gat gutpela laip bilong amamas na gat ol samting ol i nidim, maski ol i bungim taim nogut na kain, kain pasin i kamap.

Ol i makim Tok bilong God long Gospel bilong Jon sapta 10, ves 10.

“MIPELA I BILIP LONG GOD PAPA. Em i kamapim na holim olgeta samting long han bilong em. Marimari bilong em i stap long olgeta Hanmak bilong em na **Em i laik bilong em long gutpela samting bai kamap long samting em i kamapim.** Em i as bilong olgeta gutpela pasin, olgeta pasin i tru na olgeta naispela samting.

Em i gat strong insait long pasin bilong Laikim, i gat gutpela tingting oltaim, oltaim na save moa yet na em i save skelim olgeta tingting gut. Olgeta taim em i save holim witnes bilong em yet.

Laik bilong em long sevim man, ol Wei bilong em na pasin bilong em i bin kamap ples klia wantaim ol toktok bilong ol profet insait long histori bilong ol pipel bilong Israel, na moa long stori bilong Pikinini man bilong em, Jisas Kraus.

Yunaitet sios, olsem patna long ol wok bilong Indipenden Stet bi-



Asembli Seketeri bilong Yunaitet Sios bilong Papua Niugini na Solomon Ailan, Uvenama Rova. Wantok poto

long Papua Niugini, Sios i gat wok long givim gutpela kaikai bilong Spirit long ol lida olgeta taim. Insait long dispela stetmen mipela i laik strongim dispela sanap bilong sios.

Hevi we i wok long kamap nau em i winim strong na save bilong man bilong graun long stretim. Sios i lukim dispela olsem em i wanpela hevi bilong Spirit laip, olsem na yumi mas lukim long sait bilong Spirit laip.

Nambawan samting, Lidasip bilong Yunaitet Sios long PNG i singaut long **olgeta Sios long pre wantaim olgeta bel bilong ol long God bai helpim yumi.** Olsem ol Kristen, **Yu ken pre** olsem wanpela

man, meri o famili, olsem wanpela lokal konrighesen, olsem ol ministri na olsem bikpela Sios Bodi.

Buk Baibel i stori long King Solomon olsem: “Na bihain Bikpela i kamap long em long nait na i tokim em olsem, ‘Mi harim pinis beten bilong yu.

Na mi makim dispela haus olsem ples bilong ol man i ken kam na mekim ofa long mi. Tasol sapos yupela i bikhet long mi na mekim sin, orait bai mi inap pasim ren o salim ol grasopa i kam na kaikai ol kaikai long ol gaden bilong yupela, o mi inap salim wanpela bikpela sik nogut long yupela ol manmeri bilong mi.

Na long dispela taim, sapos yupela ol manmeri mi bin makim bilong mi yet, i tanim bel na sori long ol bikhet pasin bilong yupela, na yupela i kam klostu long mi na beten long mi, na lusim ol dispela pasin nogut yupela i bin mekim, orait mi stap long heven na bai mi harim beten bilong yupela na lusim ol sin bilong yupela na mekim graun bilong yupela i kamap gutpela gen. Oltaim bai mi sambai na redi long harim ol beten yupela i mekim long dispela ples, haus bilong mi i stap long en.’ (2 Stori 7:12-15)

Yumi mas pre long olgeta husat i stap insait long dispela hevi, taim yumi ritim, harim na lukim ol samting we i wok long kamap long midia. Prea tasol bai helpim yumi long

mekim rait disisen long olgeta hap bilong lidasip na em bai helpim yumi long mekim stretpela pasin. Wanem samting bai kamap, em laik bilong God tasol.

Namba tu, **Sios i mas no ken suitm tok na daunim wanpela man o meri insait long dispela tok pait bilong lidasip.** Mipela i save olsem olgeta stekholda i gat tingting bilong ol yet. Olsem na Sios i mas rispekim rait bilong wan, wan man na meri long tokaut long tingting bilong ol.

Sios i laik askim tasol long wan, wan Kristen long holim strong pasin Krisen na ol gutpela tingting.

Namba tri, Sios i singaut long ol-

geta wan wan sitisen bilong Papua Niugini, maski yu wanpela politiksen, bisnis eksekutiv, Sios wokman o meri, yu gat wok o no gat wok o sumatin, long no ken mekim pasin we i brukim lo.

Namba foa, yumi givim Pre olsem Jisas i bin pre antap long diwai kruse: “PAPA, LUSIM RONG BILONG OL BIKOS OL I NO SAVE LONG WANEM SAMTING OL I MEKIM”.

Papa God, Man bilong kamapim olgeta pipel na olgeta samting long dispela graun. BIKPELA God bilong mipela, mipela tok tenkyu long yu save lusim sin bilong mipela na yu no larim mipela long go long hel.

GOD Bikpela bilong mipela na papa bilong mipela, mipela tenkyu long Gavman, Sios na Praivet sekta, ol Skul, Helt fasiliti, na ol gutpela sevis long helpim mipela.

GOD BIKPELA bilong mipela, mipela bringim dispela hevi bilong Gavman Lidasip I kam long han bilong yu.

Mipela bilip olsem ol lida bilong mipela bai putim bilip bilong ol long yu long kisim gutpela stia na tingting long stretim hevi we i kisim ol sumatin, tisa, ol institusen, kampani, ol Gavman opisa bilong dipatmen na ol politisen, ol Sios memba na intenesenel komyuniti.

BIKPELA God na Papa, lusim rong bilong mipela, na mekim mipela long save long ol lain husat i mekim sampela rong long wanem kain wei.

Mipela i askim Holi Spirit long hgivim mipela bel isi na bringim gutpela sindaun I kam bek gen long ol lain husat i go pas long dispela hevi.

Tenkyu long harim prea bilong mipela. Long Nem bilong Jisas,

Amen!

UPNG Vais sansela i tok lukaut long pasim skul

Sam Seke & Caroline Tiriman i kam long ABC

VAIS Sansela bilong Yuniversiti bilong Papua New Guinea, Profesa Albert Mellam i tok yuniversiti bai kanselim o stopim 2016 akademik yia sapos ol i no stretim toktoklong protes i go inap long Fraide.

Profesa Mellam i mekim dispela toktok long wankain taim PNG Elektoral Komisen i no laik go holim vot sapos ol sumatin i go het long protes na i no skul.

Electoral Komisen i tok sam-

pela hap toktok insait long petisen we ol i protes long en i olsem long Prais Ministia O'Neill i raus long opis o wok, em bai kontem ov Kot, o samting we i stap long han blong kot.

Tude tu, ol sumatin bilong Yuniversiti ovTeknolojiy (Yunitek) long Lae i bin mekim wanpela awenes kempen long Eriku Oval long soim wari bilong ol long ol hevi bilong wok politik long Papua New Guinea.

Dispela bung bilong ol i soim sapot blong ol i go long ol sumatin bilong UPNG husat i

no go long skul yet, long wanem ol i laikim Prais Ministia Peter O'Neill long lusim wok bilong en.

Metropolitan Polis Komanda long Lae, Anthony Wagambie Junior i bin givim tok orait long ol dispela sumatin long bung long Eriku spot fil na autim wari bilong ol.

Ol ripot ikam long PNG i tok, planti sumatin long ol narpela yunivesiti i laik bai Mista O'Neill i mas lusim wok bilong en bihainim ol korap pasin.



Ol UPNG sumatin i protes long kempus. Poto: Rose Amos poto i kam long ABC

Bogenvil Pis Bilding Kaunsel i bung

Eleanor Maineke i raitim

Bogenvil Pis Bilding Program (BPBP) em i wok long helpim long stretim ol autstending hevi bilong Bogenvil Kraisis. BPBP i save kisim fanding long gavman bilong Australia, DFAT (Department of Foreign Affairs & Trade), aninit long Strongim Pipol Strongim Nesen (SPSN). BPBP i wok long operet long opis bilong em long Arawa.

Dispela program em i stap nau long olgeda distrik insait long Atonomas Rijon bilong Bogenvil (AROB) aninit long ol distrik pis na sekuriti komiti (DPSC's).

Atonomas gavman i bin oraitim ran bilong BPBP long wanpela BEC (Bogenvil Eksekutiv Komiti) miting long yia 2011. Na tu dispela komiti i bin tok orait long sanapim ol DPSC long ol distrik..

Long las mun, BPBP gavaning kaunsel i bin holim namba 2 miting bilong em. Namba wan miting em ol i bin holim long yia 2015, long mun Septemba.

Siaman bilong BPBP gavaning kaunsel em i ekting sif seketeri bilong Bogenvil Edninitreisen, Paul



Ol memba bilong gavaning kaunsel bilong BPBP long Arawa Yut Senta. Piksa na Stori :Eleanor Maineke



Ol memba bilong kaunsel long taim bilong diskasen long miting.

Kebori, na namba tu bilong em, Blaise Iruinu , man i makim ol Mekamui.

Dispela i wanpela bikpela miting bikos planti ol toktok i bin kamap long ol rot bai ol wokmanmeri i ken bihainim long bringim helpim i kam insait long ol famili na komyuniti bilong Bogenvil.

Insait long kaunsel tu em sampela ol memba bilong ABG (Atonomas Bogenvil Gavman) tu i stap long en. Ol

memba makim ol eks paitman insait long tripela rijon, Saut (Honorable Thomas Tari), Sentrol (Honourable Noah Doko) na Not (Honourable Ben Malatan). Minista bilong Komyuniti gavman tu em i memba bilong BPBP gavaning kaunsel.

BPBP i wok long bungim planti salens, tasol olgeda manmeri was wok bung wantaim long bringim pis i go bek wantaim trupela laik bilong pis long ol wanwan manmeri.



LONG taim bilong bikpela ren, bai yu lukim dispela kain piksa long planti hap bilong PNG. Long poto bilong Mathew Yakai, Kemson (man long piksa) na ol wanpisin bilong em bilong Simbai long Madang provins i bildim mambu bris long helpim ol ples lain i go long narapela sait bilong Waea Sekibub. Long piksa, Kemson i helpim Maggie long yusim mambu bris long go long narapela sait. Piksa na stori: Mathew Yakai, MY Media & News Agency

EU Opis holim luksave de bilong Yurop De



Grup poto bilong ol Wokman na wokmeri bilong EU Deligesen long PNG long taim bilong selebresen.

Frieda Sila Kana i raitim

LONG Mande 9 Me, Yuropien Yunien (EU) opis long Pot Mosbi i bin holim wangepela bung long Lamana Hotel, long selebretim Yurop de.

Nupela Embeseda bilong EU long PNG, Ioannis Giogkarakis-Argyropoulos i bin go pas long dispela selebresen, we ol i bin singautim ol bikman na meri bilong Foren Afes Dipatmen bilong PNG, ol narapela Diplometik Ko na ol Embeseda bilong ol narapela kantri wantaim biklain bisnis komyuniti bilong Pot Mosbi long kam selebretim dispela de wantaim.

Hia em hap toktok bilong Embeseda Ioannis Giogkarakis-Argyropoulos.

“Tude mipela i tingim taim we ol kantri bilong Yurop i bin tokaut long kamap olsem Yuropien Yunien, 66 yia i go pinis em i makim stret dispela de long kamapim wangepela supanesenel komyuniti, we ol i bin kolim, Yuropien Komyuniti bilong Koln a Stil.

Bihain long wangepela bikpela pait insait long histori bilong ol pipel ol i luksave olsem long kirapim gen Yurop long ol bagarap em i kisim long bikpela pait em bai i no inap tru long kamap sapos i no gat bel isi. Insait long 6-pela yia dispela liklik Kol na Stil Komyuniti wantaim 6-pela kantri i go kamap lkonomik Komyuniti, na stat long 1993, em i kamap wangepela Yunien. Tude, Yuropien Yunien i gat 28 Mamba



EU Embeseda wantaim Sif Protokol Opisa bilong PNG i apim glas.

Kantri na moa long hap bilien pipel. Faipela narapela moa kantri i kisim mak bilong Yuropien Yunien

kenidet kantri.

Yuropien Yunien i kamap wangepela strongpela wol ikonomi na

bikpela treid blok. Long wankain taim, EU i kisim wangepela kain rispek bilong Human Rait na Demokretik veliu. I no gat narapela ples long dispela graun nau i stap i olsem EU we pasin bilong stap fri, toktok fri na autim tingting, fri long raun nambaut, fri long pre na fri long no ken pre, fri long laikim, fri lng makim rot bilong mipela yet na wok strong long mekim em i kamap tru.

Yuropie Yunien i kamapim dispela olsem wanem? Gutpela senis long kamap gut long bungim ol ikonomi i mekim ol lida i laikim mekim moa. Gutpela samting i no kamap long strong bilong ikonomi tasol, nogat, em i kamap olsem prut bilong wok bung wantaim, bungim strong wantaim, rispek long wangepela, narapela, toktok wantaim narapela na wok hat.

Tasol mipela i no stap mipelayet. Long wol kain kwiktai gro bilong propulesen, we ol pipel i bung wantaim ol narapela piel, toktok i go i kam, karim ol kago i go i kam, EU i kisim strongpela tingting olsem Gutpela Global Gavanens em i wangepela wei tasol long kamapim dispela.

EU i gat 28 Mamba Stet tasol tu-pelo tasol i gat pes long Pot Mosbi, em Ripablik bilong Frans na Yunaitet Kingdom. Ol narapela i stap long Canberra, Kuala Lumpur o Jakarta na ol sampela Honoreri Konsul i makim ol long kantri.

Long EU i wok wantaim ol intenesenel patnasip, Papua Niugini i olgeta taim i save bekim gut pasin. Wok bung bilong mipela i kirap long wangepela i gat developmen koporesen i go long politikel koporesen.

Developmen koporesen em i wangepela gutnius stori olsem Yuropien Yunien i stap yet olsem wangepela developmen patna. Em i gutpela prais long baim na mipela i mas wokim wok antap long dispela moa. Yuropen Yunien i bin sapatim developmen bilong Papua Niugini stat long taim em i kisim independens yet i kami nap nau.

Bihain long toktok bilong Embeseda Ioannis Giogkarakis-Argyropoulos ol singim nesenel antem bilong EU na bilong Papua Niugini na Sif Protokol Opisa bilong PNG wantaim EU Embeseda i bin apim glas long soim amamas bilong dispela de.

UPNG SRC Presiden i asua

Frieda Sila Kana i raitim

MINISTA bilong Haia Edukesen, Saiens na Teknoloji, Malachi Tabar long dispela wik i tok long wanpela midia rilis olsem Presiden bilong Yunivesiti bilong Papua Niugini Studen Representativ Kaunsil (SRC) Kenneth Rapa, i asua long em i no givim petisen bilong ol sumatin long em, taim em i bin go long kism toktok bilong ol long UPNG kempas long Trinde 4 Me.

Minista Tabar wantaim sampela ol bikpela senia minista long gavman i bin go long kism petisen bilong ol sumatin long las wik tasol ol sumatin i no bin givim dispela petisen bikos ol i laikim Prait Minista yet long go na kism dispela petisen.

Minista Tabar i tok long dispela wik olsem SRC Presiden em i abrusim namba wan step bilong em inap long givim wanem kain toktok ol sumatin i gat long go long wanem man ol i laikim long harim dispela toktok. "O'Neill-Dion Gavman i givim sans long ol sumatin long Trinde 4 Me, 2016 long ol sumatin givim petisen bilong ol, tasol sori tru olsem ol i abrusim dispela sans bilong ol.

Olsem Minista i lukautim haia edukesen, mi laik mekim klia olsem Semesta wan em klostu long pinis nau. Tripela wik

tasol i stap long ol eksam bai kamap. SRC Presiden i mas tingting gut nau long wanem samting em i gutpela long olgeta sumatin," Minista Tabar i tok.

Mista Tabar i singaut long SRC Presiden long rispekim laik na tingting bilong olgeta sumatin long larim ol klas i op gen na em no ken kalabusim ol. Sapos em i no mekim, em bai olsem em bai mekim ol sumatin long kism edukesen bilong ol yet.

"Mipela bai i no inap long larim ol sumatin long widro long skul long dispela yia na traim long kam insait long yia bihain bikos taim bilong dispela em i pinis.

Em i minim olsem ol sumatin i save yet na ol i pundaun long ol kos bilong ol. Sapos ol i feil long 4 o 5-pela kos, em ol bai i raus long tupela semesta o moa.

Em i minim olsem nau bai namba tu taim bilong UPNG long kism ol nupela sumatin olgeta long yia 2017. Namba wan taim dispela kain pasin i kamap em long yia 1965, taim Yunivesiti bilong Papua Niugini i bin kirap," Minista Tabar i tok.

Long asde, Trinde 11 Me, ol sumatin bilong UPNG i holim wanpela vot wantaim lilektoral Komisen long tok olsem ol i laikim pasim skul yet o bai ol i opim.

Minista givim oda long ol sumatin i go bek long skul

Frieda Sila Kana i raitim

MINISTA bilong Edukesen na Memba bilong Gumine, Nick Kuman i singaut long ol sumatin na ol tisa bilong Nesenel Kepital Distrik na ol Yunivesiti long ol i mas go bek long skul, bihain long olgeta skul long NCD i bin stopim ol klas long Mande 9 Me.

Ol opisa bilong NCD Edukesen divisen we i lukautim ol elementri, praimer na sekenderi skul long Pot Mosbi i bin tok, ol i larim ol sumatin i go bek long haus bikos ol i tingting long sefti. Long dispela de olgeta skul, pablik na praiwet skul i no bin op.

Dispela hevi bilong pasim ol skul long Mande i bin kamap bikos Edukesen Divisen long NCD i bin pret long ol toktok bilong bikpela protes mas we ol Yunivesiti bilong PNG sumatin i bin tok



Mista Nick Kuman, Minista bilong Edukesen na Memba bilong Gumine.

long holim. Ol sumatin bilong yunivesiti i bin statim straik long tupela wik i go pinis na ol i stopim olgeta klas long yunivesiti. Dispela i mekim olgeta akademik wokman na wokmeri long stop wok tu bikos ol i pret long ol sumatin bai bagarapim ol samting long yunivesiti.

Minista Kuman i mekim strongpela toktok long ol

sumatin olsem, Edukesen Dipatmen i gat wanpela sistem ol i bihainim we i bihainim kalenda yia, na i no bihainim ol sisen o taim. Olsem na em i tok sapos ol sumatin i straik na lusim ol klas taim, edukesen sistem bai i no inap long wetim ol. Edukesen taim bilong ol lesen bai go het yet.

Mista Kuman i tok long ol sumatin bilong Yunivesiti olsem sapos ol i laik straik na pasim ol klas, orait ol i no ken ting olsem bai ol i kism gen wanem kain lesen ol i abrusim long dispela taim. Na sapos ol i no pas long ol eksam na tes long pinis bilong yia, em i asua bilong ol yet.

Em i tok, bihainim mama lo, Minista bilong Edukesen tasol i gat rait long givim tok orait bilong ol skul long kantri i ken pasim skul na i no gat narapela lain i gat dispela atoriti. Seketeri tu no gat.

"Neks yia planti eks gret 12 sumatin bai wok long painim spes long go long yunivesiti, olsem na mipela bai i no inap long larim ol sumatin husat no go long skul long dispela yia, long traim long go insait na pasim spes," Mista Kuman i tok.

"Ol sumatin i no ken pilai politik. No ken westim taim bilong yupela long stretim ol hevi we i stap long han bilong kot. Larim politik i stap long han bilong ol lain olsem mi yet.

Nau hevi i stap long han bilong ol SRC lida. Yupela i no ken kamapim birua long edukesen bilong yupela na go bek long klas," em i tok.

Long Tunde 10 Me, bihain long toktok bilong Minista Kuman, olgeta skul long NCD i go bek gen long skul tasol Yunivesiti bilong PNG em i pas yet bikos ol sumatin i no laik long go bek long skul.

Rachel Woimba – Sels Rep bilong B-Mobile Vodafon kiosk long Jacksons Intenesenel Epot I amamas long salim ol top kat na ol mobail fon long ol kastoma. Poto: Frieda Sila Kana.



Stap strong long bodi, tingting na spirit



GRAUN i ples bilong bungim hevi na stap long pen long bodi, tingting na spirit.

Na wankain stap em man bai gat taim em i amamas.

Manmeri long Papua Niugini i no narakain long ol arapela hap bilong graun.

Tasol maski sapos wanpela i stap long PNG o long narapela kantri planti bilong ol pen o amamas em bai gat bai bihainim kain disisen em i mekim o laik em i bihainim.

Wan wan bilong dispela ol pen o amamas i save kamap long sans, samting wanpela i no plenim o i ting bai kamap long em.

Wol Helt Ogenaisesen (WHO)

long 1948 toktok bilong en i tok stap strong o helti long bodi na het i no min tasol long ol sik. Nogat. i min tu long kain tingting o pilim manmeri i gat long em.

Pastaim long dispela, William Shakespeare (wanpela saveman bilong Ingran) long 1600s i tok,

"bodi bilong mipela i olsem ol gaden na laik (tingting) bilong mipela i olsem ol gadena o ol fama."

Na tru tumas dispela tok i ken tru olsem man i wari tumas long meri bilong em i dai i wankain olsem man i sik malaria o i gat sua long bodi.

Long dispela as, ol saveman i tok bodi, tingting na spirit i wanpela tasol.

Long stap helti long bodi yumi i mas oltaim ekseais olsem wokabout o ran.

Long Papua Niugini i gat kain kain sik olsem olsem malaria, TB, kensa, daiabitis (sik suga). Long abrusim kain sik olsem yumi i mas banisim yumi yet long wei yumi i

stap na wanem samting yumi i kaikai na husat yumi kaikai, dring na serim samting wantaim.

Long stap helti long tingting wanpela i no ken tingting na wari planti long wanpela samting.

Tasol long narapela sait, ol saveman i tok em i no rong sapos wanpela i wari na kra i taim pikinini, mamapapa, bratasusa, kandre, bubu o poroman i dai.

I gutpela long kra i long rausim dispela wari bikos sapos yumi pasim na i stap insait bai i ken bagarapim manmeri na ol i ken kamap longlong.

Long stap helti long spirit, ol saveman i tok dispela i bikpela samting.

Olgeta manmeri long wanpela

taim i save gat tingting olsem i gat sampela kain bikpela samting i stap bihain long dispela laip (God).

Man i dai i no min olsem em i pinis bilong laip, nogat. I gat laip bihain long dispela laip.

Taim wanpela i gat dispela tingting em i gat hop na bilip long stap bilong em na gutpela laip we em i mas stap long em.

Taim wanpela i ting olsem em i kism bel isi, stap wantaim amamas na lukluk long laip i kam bihain.

Olsem yumi tok gen, stap helti long bodi, tingting na spirit i bihainim kain disisen yumi i mekim long laip. Tingting gut, mekim ol gutpela samting na stap helti.

Flawa bisnis i gro moa yet

Stori na Wok

wantaim Elizabeth Cox

Skrui i kam long las wik.

Painim Pis, Painim Abus, na Kainkain Kaikai Bilong Bus

Toksave: NAU long dispela taim, yumi save harim planti stori bilong nutrisen na planti stori bilong gutpela gaden kaikai. Tasol sampela lain ol i no manmeri bilong wok gaden.

Ol i lain bilong wara o bilong bik bus na ol i strong long painim kaikai. Bus na baret na solwara bilong yumi i gat planti kainkain gutpela kaikai.

Nogut yumi stori long nutrisen kaikai na lusim tingting long ol dispela gutpela kaikai.

Long sampela hap tu, ol manmeri i strong long tupela samting wantaim, long gaden kaikai, na saksak, abus, pikinini diwai o kumu long bus.

Nogut kain lain olsem i stat long bilip olsem kaikai bilong bus em i samting bilong kanaka o em i no nutrisen kaikai, na ol i lusim.

Nau long dispela taim i luk olsem planti manmeri ol i les long painim ol gutpela kaikai bilong bus, o solwara. Sampela ol i asua pinis long sotgan na pinisim ol abus bilong ol.

Planti liklik manki na skul pikinini ol i no lainim moa long painim kaikai long bus. Long sampela ples bus i sot bikos ol i planim planti kes krop (cash crop) o salim graun long ol timba kampani long katim.

Ol papamama mas klia olsem bus em i wanpela ples bilong nutrisen kaikai tu. Na tu ol i mas save olsem sapos yumi strong long pis bilong yumi yet bai yumi yet bai yumi sevim mani na helpim kantri.

Tinpis na tinmit em i bisnis bilong narapela kantri.

Ol Meri Inap Long Mekim Wanem?

Taim ol meri i bung em i gutpela long skulim ol bai ol i klia – yumi inap painim gutpela nutrisen kaikai long bus na long wara. Sampela taim yupela i ken raun wantaim o go huk wantaim.

Traim na skulim ol pikinini tu long wokim olsem. Sapos ol mama i klia pinis olsem planti kaikai bai bilong bus i gutpela, wanpela bikpela wok bilong ol mama em long givim gutpela skul na toktok long olgeta manmeri long ples olsem noken pinisim o bagarapim olgeta abus. Lukautim gut, larim sampela i stap; na noken guria long salim.

Gutpela bus na gutpela baret em i bikpela samting long ol man long ples long kainkain wok na samting bilong helpim sindaun. Gutpela kaikai em i wanpela long ol dispela samting.

Stori na ol Poto: Anna Solomon

FLORIKALSA o bisnis bilong ol flawa em i wanpela liklik bisnis planti ol meri long PNG i wok long go pas long en nau.

Na long dispela wik, sampela ol dispela meri i bin kam bung long Mosbi long Namba 8 Flawa So na soim kain kain stail flawa bilong PNG na promotim dispela bisnis bilong florikalsa.

PNG Kat Flawa Asosiesen i bin go pas long dispela flawa so.

Bosmeri bilong ol, Mary Saun i tok em i amamas long lukim ol meri i painim mani na baim tiket na eksek kago bilong ol flawa long kam soim na promotim dispela bisnis. Em i tok em i amamas long lukim olsem ol meri i lainim planti samting long pasin bilong stretim gut ol flawa na ol arapela pasin bilong strongim dispela bisnis bilong florikalsa.

Misis Cecilia Kagen, dairekta bilong edukesen na trening wantaim Dipatmen



Cecilia Kagen raithan i opim Namba 8 Florikalsa So long Mosbi.

bilong Egrikalsa i bin opim dispela so long Trinde 4 Me na em i tok amamas long ol meri i strong yet long promotim dispela bisnis bilong ol flawa.

Em i tok ol i luksave olsem dispela bisnis inap long kamap bikpela moa na kamap wanpela rot bilong pulim mani i kam insait long kantri.

Misis Kagen i tok tenk yu long Misis Mary Saun wantaim ol arapela komiti memba husat i strong long promotim dispela bisnis long ol arapela

provins tu. Ol meri i kam long Morobe, Oro, Isten Hailans, Simbu na Manus wantaim ol kain kain flawa na ol lip olsem ol target na ol arapela stail flawa na arapela bilas bilong bus.

Ol lain i kam long Hailans i bin karim ol naispela flawa bilong kol ples.

Ol i putim ol flawa long so na ol i salim tu planti long ol visita husat i bin go lukluk raun long ol stol long dispela wik.

Dispela flawa so i bin stat long Mande 2 Me na i pinis long Sande 8 Me.



Meri Manus wantaim ol stail flawa bilong em.



Ol meri husat i sanapim ol flawa stol bilong ol long dispela so.



Waimale Takis i soim sampela naispela rose flawa em i karim i kam long Kabiufa, Isten Hailans Provins.

Ol stail flawa bilong kol ples

Stori na ol Poto: Anna Solomon

WAIMALE Takis i bilong Kabiufa long Isten Hailans.

Em i wanpela mama husat i save groim ol kain kain flawa bilong kol ples na salim long maket long Goroka yet o sampela taim em i save go olgeta long Lae long salim ol dispela naispela flawa bilong em.

Las wik em i bin kam daun long Mosbi wantaim sampela arapela mama long soim ol naispela flawa bilong em long Namba 8 Florikalsa So.

Ol flawa groa bilong Isten Hailans, Morobe, Simbu, Oro na Manus i bin kam bung wantaim ol lain

bilong Mosbi na soim ol naispela flawa na ol stail pasin bilong stretim ol flawa na bilasim ples.

Waimale na ol lain bilong Goroka i bin karim ol kain kain flawa olsem ol rose na lili na planti ol arapela flawa bilong kol ples.

Planti ol visita i bin baim ol sid na hap han bilong ol kain kain flawa olsem rose.

Wantok i askim Waimale long dispela flawa so na em i tok dispela em i namba 4 taim bilong em nau long kam soim ol flawa.

Em i tok em yet i hatwok long painim mani bilong tiket na baim eksek bilong ol flawa long putim long dispela so.

Enga Provinsal Gavman givim kar

ENGA Provinsal Gavman i strongim patnasip wok wantaim PNG Traibel Faundesen na GE (PNG) long daunim namba bilong ol hevi i save painim ol mama na bebi long taim bilong karim bebi insait long Enga Provins, wantaim wanpela kar bihain long ol i opim nupela VScan Paillet Program long las wik.

Long las wik, Enga Enga Children's Trust Fund, i makim provinsal gavman na i tokaut long sapot na patnasip bilong en wantaim PNG Traibel Faundesen na GE (PNG) taim ol i givim wanpela Toyota 10 Sita Lenkrusa i go long VScan Pilot Program.

Dispela trak i kamap wanpela bikpela helpim long dispela Paillet Program bikos em bai helpim ol Program Kodineta long go long ol 7-pela helt senta i nsait llong provins, we sampela i stap i nsait tru long bus we i no gat gutpela rot i stap long en.

Gavna bilong Enga Provins, Sir Peter Ipatas, i bin givim ki bilong trak i go long Dokta Solomon Kalit, VScan Program Kodineta, na em i tok amamas long PNG Traibel Faundesen na GE (PNG) long komitmen bilong ol long kamapim



Sir Peter Ipatas, Gavana bilong Enga Provins wantaim ol senia opisa bilong provinsal gavman na ol bos bilong Traibel Faundesen na GE (PNG) i kisim poto bihain long Sir Peter i givim ki bilong len krusa i go long VScan Program Kodineta, Dokta Solomon Kalit. *Poto: Traibel Faundesen.*

gutpela helt sevis deliveri, na moa long ol helt bilong ol mama na ol pikinini long Enga provins.

Sir Peter i to tenkyu tu long Ela Motors long gutpela sapot ol i save givim long ol helt program insait long Enga provins.

Traibel Faundesen Dairekta – Operesens, Michelle Hau'ofa i tok, "Taim ol i statim Program, VScan i soim pinis olsem em i wanpela

gutpela we bilong helpim long hevi ol mama na pikinini bilong Enga i save bungim long helt bilong ol.

Tasol long kain tul olsem VScan i wok gut, i mas gat ol gutpela sistem na lojistik sapot o sapot bilong i go long ol ples bilong mekim wok.

Trak we Enga Provinsal Gavman i givim em i wanpela bikpela

samting long sapotim sistem olsem bilong go long ol ples i longwe na bringim sevis olgeta taim.

Mipela i amamas long Enga Provins Gavman long luksave olsem mipela i nidim wanpela trak na givim olsem bilong strongim patnasip bilong mipela."

Peter Loko, GE (PNG) Kantri Lida i tok, "GE i amamas long sapotim

wanpela kain bikpela wok bilong PNG Traibel Faundesen.

Planti wokman na wokmeri bilong mipela i gat gutpela stori bilong Enga Province na mipela tok amamas long Gavana Sir Peter Ipatas na Provinsal Gavman long ol i lukluk i go pas na givim dispela kain sapot.

Mipela i gat strongpela tingting long kamapim gutpela helt bilong ol mama na ol bebi na mipela i wok long painim wei yet long mekim dispela program i go bikpela moa."

Presentesen bilong trak i bin kamap long Ipatas Senta long Wabag taun we Sir Ipatas, Michelle Hau'ofa bilong Traibel Faundesen, Peter Loko bilong GE (PNG) na ol senia Provinsal eksekutiv olsem Dokta Samson Amean, Provinsal Edministreta, Sif Inspekta George Kakas, Provinsal Polis Komanda, Pato Potane, Bod Siaman bilong Enga Provinsla Helt Atoriti (EPHA); Aaron Luai, CEO EPHA, Dokta Guboro Urae, Dairekta Kurektiv Helt Sevis (EHPA), Dokta Solomon Kalit, VScan Program Kodineta, i bin stap.

Mindre elementeri skul lainim kung fu

James G. Kila i raitim

OL SUMATIN i mas mekim bodi ekasesais taim ol i kirap long bet long morning na redi long go long skul.

Ol i mas stretim masol bilong ol na ol join long bodi long moning na kisim gutpela tingting na go was na redi long go long skul.

Dispela em sampela gutpela skul toktok Dokta Ming Meng i bin mekim i no long taim i go pinis' long taim bilong Nesenel Maining Sefti Wik long Mindre Elementeri Skul klostu long Basamuk long Raikos distrik long Madang.

Dokta Meng em medikol suprintenden long Basamuk Rifaineri

bilong Ramu NiCo (MCC) long Raikos distrik, Madang.

Dokta Meng i tok sampela gutpela bodi ekasesais em ol kung fu stail na muvmen. Dispela i ken givim ol pikinini gutpela ekasesais na tu stretim ol join long bodi bilong ol.

Em i tok planti lain i save laikim ol kung fu

muvi bilong Bruce Lee, Jet Li na Jacky Chan.

Ol dispela lain i save wokim ekasesais olgeta de na ol i save training bodi bilong ol gut tru wantaim tingting bilong ol tu wantaim.

Olsem na ol sumatin i ken yusim ol olsem piksa long lukautim bodi bilong ol na stap fit na helti olgeta taim.

Australia helpim helt bilong ol mama karim pikinini



Ol lain bilong Send Hope Not Flowers na The Hands Of Rescue wantaim Nambatu Hai Komisina bilong Australia long PNG, Bronte Moules (namel) holim model bebi, "Sophie".

WANPELA ogenaisesen bilong Australia 'Send Hope Not flowers,' nau i wok long bringim wanpela helt program bilong helpim ol mama long taim ol i kisim bel na long taim bilong karim, insait long Milen Be Provinsis, wantaim helpim bilong Australia Hai Komisina.

Sevim Mama Intevensens program i wok long helpim long daunim namba bilong ol mama i dai long taim bilong karim bebi, wantaim ol skul tok long mekim ol mama i mas panim helpim long haus sik o wantaim ol helt wokman na meri long taim bilong ol i laik karim bebi. Ol i wok long trenim ol helt wokman na wokmeri long wanem we ol inap long helpim ol mama long taim bilong imejensi bilong kisim bebi. Ol i wokim ol haus bilong

wet long karim bebi klostu long haus sik long ol mama husat i stap longwe long haus sik long kam na stap wetim taim bilong karim. Planti taim ol mama long ol longwe ples i save bungim hevi bikos ol i no hariap long go long helt senta o haus sik taim ol i pilim pen bilong karim bebi.

Namba tu Hai Komisina bilong Australia, Bronte Moules, i amamas long bung wantaim ol bod memba bilong 'Send Hope Not Flowers' wantaim ol PNG patna ogenaisesen bilong ol long Pot Mosbi, long givim ol tupela model o piksa samting bilong olgeta samting ol mama bai yusim log taim bilong karim bebi na ol samting bilong ranim training.

model bilong karim bebi em bai ol i yusim long lainim ol lokal helt wokman na wokmeri long ol bai inap long mekim wok long taim bilong imejensi bilong ol mama laik karim bebi.

"Send Hope Not Flowers em i no wanpela ogenaisesen we i save wokim propit, tasol em i save wok long kamapim mani na luksave bilong matenel motaliti o hevi bilong ol mama i dai long taim bilong karim bebi insait long ol liklik kantri we i wok long develop yet.

"Ol model bilong karim bebi bai sapotim trening bilong ol helt wokman na meri, na ol bai kisim moa save na wei bilong lukautim ol mama long taim ol i redi long karim inap long taim ol i karim pinis, long olgeta hap bilong Milen Be," Mis Moules i tok.



Dokta Ming Meng i soim kung fu ekasesais long ol sumatin long Mindre elementeri skul. *Poto: James G. Kila*

Makim Wol Komyunikesen De



Wok na stap wantaim Jisas

LONG taim bilong Idulfritri, bikpela selebresen bilong Muslim, planti manmeri i wok long bikpela siti na taun i save go bek long ples bilong ol na selebretim wantaim papamama na famili bilong ol.

Long ples ol i save wokim naispela stori na gutpela laip bilong siti o taun. Olsem na planti manmeri i aigris na laik traime lak (luck) bilong ol. Taim ol manmeri i go bek long siti o taun, planti nupela manmeri i save go wantaim ol tu.

I gat wanpela yangpela meri, nem bilong em Sinari. Em i bin pinisim gret 12 long sekenderi skul na i stap nating long ples. Olsem na em i bihainim pren bilong em i go traime lak bilong em long siti.

Em i stat wok long wanpela nait klap na stap wantaim pren bilong em long wanpela lodging o ples bilong slip. Sampela wik bihain, em i painim aut olsem wok long nait klap em i egensim spiritual laip bilong em. Em i kamap long wanpela strongpela Katolik famili na bilip bilong em i strong tru. Olsem na taim em i stat wok long dispela nait klap, em i bungim bikpela salens tru. De taim em i malolo na nait em i go wok.

Tupela wik bihain, em i mekim wanpela bikpela disisen. Em i lusim dispela wok olsem wetres long nait klap. Em i lusim tu hap em i slip long en wantaim pren husat i bringim em i kam long siti. Em i painim wei bilong em yet nau. Em i laik painim wanpela wok i no kamapim sin o trabel.

Wanpela de, em i wokabaut painim wok na malolo long wanpela bas stop long fran bilong wanpela haus lotu. Isi isi em i wokabaut i go insait long haus lotu na wokim prea. Taim em i pre pinis, em i kam aut long haus lotu na baim sampela dring ol manmeri i salim arere long rot.

Taim em i dring i stap, em i lukluk strong i go long bilding bilong haus lotu. Na em i pulim wanpela pensil na pepa long beg bilong em na stat long droim piksa bilong haus lotu. Taim em i pinis wokim piksa bilong haus lotu, wanpela sista/nun i wokabaut i kam na lukim dispela piksa. Em i nais tru, sista i tok. "Droing bilong haus lotu yu wokim em i naispela tru. Inap mi baim?" Tasol Sinari no laik salim. Em i givim tasol long sista.

Bihain, tingting kamap long Sinari. "Mi i gat talen long droing, ating i mobeta mi bai sindaun klostu long man i salim dring na droim piksa."

Olgeta de em i kam long dispela ples na stat long wokim wok bilong em long droim piksa. Kain kain piksa em i mekim. Sampela taim em i droim piksa bilong man i sindaun na salim kaikai o dring. Piksa bilong lapun manmeri i wokabaut wantaim stik. Piksa bilong manmeri i resis i go insait long PMV bas... piksa bilong man i klinim rot na planti narapela moa.

Planti manmeri i kam na lukim hatwok bilong em. Ol i tok, "hatwok bilong dispela yangpela meri i naispela tru." Ol i amamas na baim piksa bilong em. Long dispela we Sinari i wokim mani long sapatim laip bilong em na tu em i bin sevim planti na salim i go long papamama long ples.

I gat wanpela gutpela pasin i stap strong wantaim em. Olgeta moning bipo long statim wok bilong em na olgeta apinun taim em i pasim wok bilong em, em i save go insait long haus lotu na pre. Long dispela wei tasol, planti blesing em i bin kisim long hatwok bilong em olgeta de. Em i wanpela stretpela wei long wokim mani. Em i amamas tru na i tok. "Mi kamap strong long dispela wok bikos Jisas i stap klostu wantaim mi na helpim mi olgeta de."

- Long taim yupela i stap long dispela graun, ol hevi bai kamap long yupela taso bel bilong yupela i ken stap strong. Mi winim pinis strong bilong dispela graun (Jon 16: 33)

- Sapos yumi stap wantaim Jisas, strong bilong em inap long helpim yumi long daunim kain kain hevi bilong dispela graun.

Bruder Szymon Porwol SVD, i raitim

LONG selebretim Komyunikesen De, 12-pela Katolik Komyunikesen manmeri i wok wantaim midia insait long Pot Mosbi i bin stap insait long wanpela semina long glasim komyunikesen na rot we yumi wan wan i save yusim midia long komyuniket wantaim God na ol arapela manmeri.

Dispela yia em i namba 50 Wol Komyunikesen De na het tok we Pop Francis, hetman bilong Katolik Sios long wol i makim na sios i yusim em "Komyunikesen na Mesi (wok marimari): Gutpela bung." (Communication and Mercy: Fruitful Encounter.)

Pastaim long semina we Katolik Bisops Konprens i bin go pas long en, Misa lotu i bin kamap long Mary Help of Christians sios long DBTI, Taurama, na Pater Victor Roche SVD Jenerel Seketeri bilong Konprens bilong ol Katolik Bisop (CBC), wantaim helpim



Grup i makim ol midia na ol peris i bin sindaun long semina long Emmaus Konprens Senta, DBTI.

bilong ol narapela pater, i bin go pas long dispela lotu.

Tripela samting we Katolik Sios i bin luksave long ol na selebretim long dispela Sande em, Asensen Sande bilong luksave long de we Jisas i bin go bek long Heven, Madas de o de bilong ol mama na namba 50 Wol Komyunikesen De.

Long tok skul bilong en, Pater Victor Roche SVD i bin givim gutpela toktok na mekim

klia mesej bilong God long wol na wok bilong ol midia lain em long bildim gutpela toktok wantaim ol pipel na komyuniketim o salim ol mesej long ol kain rot.

Semina long Emmaus Konprens Senta we pater Ambrose Pereira, SBD i go pas long en i bin lukim 12-pela Katolik Midia na Komyunikesen lain i bung na toktok long rot we ol i ken yusim gut midia long komyu-

niketim mesej bilong God long yuniti, laik pasin na bel isi pasin long dispela kantri.

Ol bikpela toktok i bin kamap long dispela semina em; God bilong yumi i save komyuniket wantaim yumi, nidim ol komyuniketa na komyuniket wantaim God.

"Dispela i bin givim mi, na mi bilip tu olsem ol narapela, long lukim olsem komyunikesen em i bikpela samting," Bruder Szymon i tok.

Long sait bilong sering, "Autim bilip long wok Midia, Bruder Szymon i tok dispela i bin givim sans long 4-pela lain wantaim em tu long sea we wok bilong em long midia i larim em i serim Gutnius long gutpela rot.

Long dispela semina tu, ol i bin makim tupela lain, Anna Solomon nau i ritai jenelis husat i bin bos bilong Wantok Niuspepa na Dulcie Amonius bilong FM 100 long CBC Sosel Komyunikesen Bod.

Semina i bin pinis na olgeta lain i bin go kaikai lans na bihain, go long haus bilong ol.



Foapela lain em Bruder Szymon SVD bilong Word Publishing Kampani i save kamapim Wantok Niuspepa, Anna Solomon em biknem jenelis long PNG nau em i pinis wok na i save helpim Wantok Niuspepa long wanpela de insait long wanpela wik, Dulcie Amoniu i ripota wantaim FM 100 na Paul Harricknen em wanpela loya i nau wok wantaim Katolik Profesenels i bin serim eksperiens bilong ol long rot we Katolik bilip bilong ol i stiaim ol long komyunikesen wok bilong ol.



Taim bilong Misa lotu long Mary Help of Christians sios long DBTI, Taurama. Ol Foto: Pater Ambrose Pereira SBD.

Kombain envairomen semina

SIOS i gat bikpela wari long envairomen bikos man yet i kamapim ol bagarap nau na ol pikinini na bubu bai stap long wanem kain wol long bihain taim.

Tupela wik i go pinis, ol Katolik Edukesen seketeri i kam long olgeta hap bilong PNG i bin sindaun long wanpela wik wok-sop long envairomen wantaim ol wanlain bilong ol long Pasifik Edventis Yunivesiti (PAU) ausait long Mosbi siti.

Woksop i bin glasim ol samting aninit long tingting, lukautim mama graun bikos em i asples bilong yumi we ol lain long semina i bin wokim

ol diskasen, ol tingting na ol toktok long ol eria olsem; Wanem kain wol mi laikim bai ol pikinini bilong yumi bai stap long en?

Wanpela lain i bin stap insait long dispela semina i tok semina em i gutpela stret bikos em i strongim na salensim em na tu, givim em gutpela tingting.

Lukautim mama graun bikos em i asples bilong yumi i hap long pas bilong Pop Francis we i laikim bai lukautim mamagraun na envairomen, na rispektim ol tarangu na ol i mas gat ol risos olsem seif wara n a ol arapela samting.



Sister Mary MacCarthy bilong CBC Katolik Edukesen long taim bilong semina. Foto: CBC Katolik Edukesen

Ol pablik i no gat rot bilong soim belpen bilong ol

INAP tupela wik nau, ol studen i wok long toktok strong long Praim Minista i mas step daun long wok bilong em. Na ol i singaut tu long Polis Komisina i mas opim gen opis bilong frod skwat na larim ol opisa i mekim wok bilong ol.

Ol studen long Yunivesiti bilong Papua Niugini long Pot Mosbi i no go skul. Ol i tok bai ol i straik inap gavman i harim singaut bilong ol. Na ol studen long Yunivesiti long Lae i bin vot na moa studen i sapatim tingting bilong straik.

Ol studen i protes bikos ol i no amamas long pasin i kamap nau we ol bikman husat i gat kot i stap yet long wok na i no step daun inap kot i kliaim nem bilong ol.

Ol i protes tu bikos polis komisina i bin rausim frod skwat na pasim wok bilong ol. Tasol long dispela wik, polis komisina i larim opis bilong frod skwat i op gen tasol bai i gat kontrol long wanem kain ol wok dispela opis i ken mekim.

Long Mosbi, ol skul i bin pas long Mande bikos i bin gat kain kain tok pret i kamap long sosel media we i tok ol skul bai pas bikos bikpela protes mas bai kamap long Mande. Tasol ol polis i tok save long Sande olsem bai i no

gat wanpela protes mas bai kamap. Dispela paul toktok i mekim ol papamama i pret na ol skul tu i tingting planti long sefti bilong ol studen olsem na planti skul i salim ol pikinini i go bek long haus.

I gat bikpela askim i stap nau long tingting bilong planti pipel. Watpo na ol polis i no save givim tok orait long ol pipel i mekim protes mas? Planti yia nau i no gat wanpela protes mas i kamap long Mosbi o ol arapela taun long kantri bikos ol polis i stopim ol pablik long bung na protes long autim wari bilong ol.

Bikpela as bilong stopim ol protes mas em bikos ol polis i no inap long kontrolim ol pipel. Ol i pret bikos planti ol trabelman bai hait namel long pipel na yusim dispela sans long kamapim bagarap long pablik propeti.

I gat rul tu i tok sapos pablik i laik mekim protes, orait ol i mas salim tok save pas i go long polis 10-pela de bipo long taim ol i laik protes. Sapos ol polis i givim tok orait, em nau ol pablik i ken protes.

Ating yumi mas painim narapela rot bilong larim ol pipel i bung na autim kros bilong ol. Pasin bilong stopim protes oltaim em i no gutpela na i mas

senis bikos ol pablik i pilim olsem ol i no gat rot bilong soim belpen bilong ol.

Yumi no mas lusim ting tu olsem PNG i gat ol lo na i gat mama lo o konstitusen i tok klia long rait bilong ol pipel. Ol pipel i gat rait long protes o bung long soim olsem ol i no amamas long disisen bilong gavman. Tasol yumi i mas save tu olsem ol arapela pipel i gat rait long stap seif

na i no gat bagarap i ken kamap long propeti bilong ol.

Ol pipel husat i kamap long kot tu i gat rait long wet inap kot i skelim toktok na givim disisen bilong en.

Yumi ol manmeri nating i no inap long singaut long ol i step daun o lusim wok inap kot yet i givim disisen bilong en. I gat ol kain lain olsem Lidasip Traibunal o Ombudsmen Komisin i stap long

mekim dispela wok.

Wankain olsem kot bilong Praim Minista o ol arapela lida bilong kantri.


Bikpela kot bilong kantri yet i ken skelim na yumi no inap long traime subim laik bilong yumi i go insait long bisnis bilong kot.

Olsem na mobeta ol studen na husat ol arapela lain i kros long dispela i mas stap isi na wetim kot long mekim wok


bilong en.

Ol studen i lusim skul inap tupela wik nau na dispela disisen bilong ol bai i no inap helpim ol wan wan studen long stadi bilong ol.

Minista bilong Edukesen tu i mekim strongpela toktok long ol studen i mas go bek long skul bikos tupela wik em i longpela taim na i no inap helpim ol.



CONDOLENCE MESSAGE



Late Governor Hon. Anderson Agiru, MP


On Behalf of the Board of Directors of Petroleum Resources Kutubu Limited, I wish to convey my heartfelt sympathies to the people of Hela and Southern Highlands Provinces on the passing of their leader the Late Governor Anderson 'Pawa' Agiru.


Late Hon. Agiru was first appointed as a Director on the Board of PRK in 1997 in his capacity as the then Governor for Southern Highlands Province. He served till 2003. He was then re-appointed to the board in 2007 and served till 2012 before being elected as the founding Governor for the new Hela Province.

I have known the late Governor since 1987 in his days as the First Secretary to the then Fisheries Minister and Kikori MP late Hon. Allan Ebu and then as a colleague and friend during his 11 years, as a director on the PRK board. He made a notable contribution to the growth of PRK and especially in investment negotiations in the PNG LNG project and for landowner participation in the projects. I have always looked up to him to take the lead on our behalf. He was a visionary leader, a brother, and a friend. He will be missed.

May His Soul Rest in Eternal Peace.
'Mano Hame Ne Ayaba'. 'Kamaubo'

Abraham Murepe
Chairman - PRK







Published Weekly, Thursday, for Word Publishing Company, Ltd.
P.O. Box 1982, Boroko, NCD
Papua New Guinea
Telephone: (675) 325 2500
Fax: (675) 325 2579
Email: editorial@wantokniuspepa.com

**Pe bilong wanpela yia
52 niuspepa**

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga

Editor
Veronica Hatutasi

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms of acceptance are available at Word Publishing Company Ltd and are set out full on the display advertising form.

Peter Hill go insait long solwara matmat

James G. Kila i raitim
PLANTI manmeri husat i stap longpela taim long Madang taun, bai save long Peter Hill, dispela waitman, husat i save wok olsem plama na stretim ol wara-paip insait long taun.

Peter Hill, em i papa bilong Jomba Plaming Kampani, wanpela

namba wan plama kampani we i save go pas long putim na stretim ol wara paip na ol stretim ol septik toilet long Madang taun.

Dispela strongpela man bilong wok hat, Peter Hill i bin dai long Fraide, Epril 29 long Madang bihain long em bin sik long pela taim.

Wanpela spesel seremoni i bin kamap long

Madang long Sande, Me 1, 2016 we meri bilong Peter, Maureen Hill wantaim Sir Peter Barter, pastaim Nesenel Palamen Memba na Rijonal memba bilong Madang na ol gutpela pren bilong em i karim kopin bokis bilong em i go planim long solwara bilong Astrolabe Be, Madang Provins.

Peter Hill yet i laikim olsem bodi bilong em i mas go daun long solwara taim em i dai.

Pastaim long bodi bilong Peter Hill i go daun long solwara, Pater Jan Czuba, pastaim Presiden bilong Divain Wod Yuni-versiti, i mekim lotu antap long wanpela bet bilong sip na bihain ol i putim ol brik wantaim bokis na larim i go daun

long solwara.

Moa long 500 manmeri i bin go bung long Sugeng Aben eria klostu long Madang Risot Hotel long Sande, Me 1 long wanpela lotu, pastaim long Sir Peter Barter i karim bodi bilong gutpela pren bilong em long sip bilong em, MV Kalibobo Spirit long go planim long solwara.

Presiden bilong Madang Semba ov Komes na Industri, Kevin Murray i salim

bikpela tok sori tru long meri bilong Peter Hill, long dai bilong man bilong em.

Mista Murray i tokaut olsem Peter Hill em wanpela bikpela memba bilong Madang komyuniti, na man husat i stap moa long 53 krismas olgeta long Madang taun.

Na em man i gat bikpela hanmak stret long developmen bilong Madang taun.

"Long ol yia pastaim long PNG kisim indipendens, Peter Hill i bin holim posisen tripela taim olsem Presiden bilong Madang Taun Kaunsil. Em wanpela man husat em namba wan memba na tu bin Presiden bilong Lions Klap ov Madang," Mista Murray i tok.

Peter i wanpela long ol lain husat i kirapim Madang

Semba ov Komes na Industri (MCCI). Na taim em i sindaun long ol miting bilong MCCI em i save givim planti ol gutpela tingting na save sapatim gutpela wok developmen long kamap long Madang taun.

Mista Murray i tok

olsem ol long-taim memba bilong MCCI bai tingim yet ol gutpela memori bilong Peter Hill long ol semba miting na bai sori tru olsem dispela strongpela man i no stap namel long ol nau.

"Peter save namba wan man long mekim toktok taim em i lukim olsem disisen bai gutpela long Madang komyuniti na bai helpim planti lain.

"Peter Hill em wanpela man husat no save surik long givim helpim i go long wanem lain i nidim helpim long wanem save em i gat long wok bilong em, "Mista Murray i tok.

Em i tok MCCI na Madang komyuniti i lusim wanpela strongpela man, long taim bilong Peter Hill i dai.

Wanpela komyuniti lida long Madang taun, na pastaim nius ripota, Benny Bogg, i tok planti lain long Madang long bipo i save gut tru long Jomba Plaming Kampani na Peter Hill.

Mista Bogg i tok Madang taun i gro long hanmak bilong kain strongpela waitman olsem Peter Hill, husat em wanpela sitisen bilong PNG na man husat i kolim Madang olsem asples bilong em stret.

"Peter Hill i dai tasol em i gat planti hanmak tru long Madang na tu em i givim planti training long sait long wok plama long planti lain bilong Madang na ol bai skruim yet stori bilong dispela naispela man," Mista Bogg i tok.

CONDOLENCE MESSAGE



Late Governor Hon. Anderson Agiru, MP

On Behalf of the Board of Directors of the Petroleum Resources Moran Limited and the Homa Pawa Peoples Association, I wish to convey my heartfelt sympathies to the people of Hela and Southern Highlands Provinces on the untimely passing of a great leader and my Director the Late Governor, Honorable Anderson Agiru.

The late Governor was a Director on on the board of PRM at the time of his passing. He was first appointed to the Board in 2002 in his capacity as the Governor for Southern Highlands Province. He served till 2003, then he was re-appointed as director in 2008 where he remained. Late Hon. Agiru was the first Governor ever to successfully commission an extended well test for the Moran Fields which later became PDL5. He committed to building the Homa Pawa Road to link the area to the rest of the highlands. We will miss him and his tenacity in articulating and interpreting the English language to his Huli people in negotiations.

Hamene Gavna Agiru Moran wali agali naga biabe dawua biribago, Moran Oil pelalu PRM helaripago naga tara timbuni ho wia haro!

May His Soul Rest In Eternal Peace.

Pape Punga
Chairman - PRM



Strongim Kristen felosip long rurel risos projek eria

James G. Kila i raitim

STAT LONG 7-kilok long olgeta Tunde na Fonde nait samting olsem 10 na 15-pela lain man i save dres gut tru na karim gita na baibel bilong ol, na bung long felosip o liklik lotu long nupela kemp long Basamuk.

Ol dispel lain em ol wokman bilong Ramu NiCo Menesmen (MCC) long Basamuk Rifaineri long Raikos distrik, Madang provins. Planti long ol wokman i lusim meri na pikinini na go wok long we, tasol bikpela samting i bungim ol wantaim em Tok Bilong Papa God tasol.

Dispela felosip grup em ol lain Kristen brata i memba bilong Rivaivel Senta bilong PNG (RCPNG) na ol i save bung olgeta Tunde na Fonde nait, na wokim wanpela aua lotu long komyuniti kibung ples long nupela kem bilong ol Ramu NiCo Basamuk wokman.

Dispela Basamuk RCPNG felosip grup i gat planti naispela stori tru.

Wanpela em, wan wan memba bilong grup i givim taits na ofa bilong ol long helpim sanapim wanpela haus kapa sios long ples Dein. Taits i min olsem ol wokman i save givim 10 pesen long pe bilong ol i go long Papa God long wok misin bilong em. Ofering bilong ol tu i go long sapotim wok bilong God, na dispela i helpim long sanapim nupela haus lotu long Dein viles.

Dispela viles Dein i stap olsem tupela kilomita longwe long BSK kem na ol memba bilong Basamuk RCPNG felosip grup i save go olgeta Sande long lotu long Dein sios.

Narapela bikpela samting we ol taits i mekim em long sapotim wok bilong Pastor Titac Kuwo long karimaut wok misin long ol maunten ples long Raikos i go daun long nambis. Dispela grup wokman long Basamuk i luksave olsem Tok bilong Papa God i ken strongim ol long Kristen bilip long wok ples bilong ol na tu, helpim ol arapela wokman long bihainim stret gutpela laip na sindaun. Dispela i kamap long taim we mani i wok long paulim wok-about bilong planti wokman na ol i pundaun long pasin blong sin na bikhet na dring bia na amamasim skin tasol long dispela graun.


Basamuk RCPNG felosip i bin stat long 2008 long olpela kem bilong Ramu NiCo. Wan wan ol Kristen brata long dispela taim i save bung na lotu.

Grup i gro wantaim namba taim ol i muv i go long nupela kem. Long hap yet ol memba i raitim wanpela leta i go long menesmen bilong Ramu NiCo (MCC) na leta ya i go long han bilong Deputi Rifaineri Jeneral Menesa, George Wang, husat i amamas na givim tok orait long grup long yusim wanpela komyuniti senta long nupela kem long ol wokman i ken holim felosip bilong ol.


Bihain long ol lain memba bilong RC-PNG kisim tok orait, ol arapela Kristen brata tu olsem ol lain Katolik Sios memba na Lutheran na tu SDA i save go yusim komyuniti eria long mekim felosip bilong ol.



Ol wokman bilong Basamuk Revival Centres of PNG felosip group. Foto: James G. Kila



CONDOLENCE MESSAGE





Late Governor Hon. Anderson Agiru, MP

On Behalf of the Board of Directors of the Petroleum Resources Gobe Limited and the Gobe Leadership Committee, a political mouth piece of the entire Gobe Oil and Gas fields in the Gulf and SHP, I wish to convey my heartfelt sympathies to the immediate family, relatives and the people of Hela and Southern Highlands Provinces on the untimely passing of their leader the Late Governor, Honorable Anderson Agiru.

Late Hon. Agiru was first appointed to the board of PRG in 1997 as Governor SHP. He served as a Director up till 2013. The Late Governor was a very unique man with a high profile character in all his endeavors be it in politics, socializing or in all his representations as son, brother, uncle, nephew, leader or colleague when interacting at all levels within communities nationally and internationally. A notable contribution he signed off on was the Gulf-Southern Highlands Highway under the Gobe Project Development for the people of Gulf and Southern Highlands; a gift to the nation. Your fond memories and characteristics are like sink holes to the minds of all many far and wide.

May you Rest in Eternal Peace Kameo and Base Eraloe.

Philip Kende
Chairman - PRG

Kanage promotim nupela Tumbuna TV long Madang



Meri ya amamas long kisim poto wantaim Kanage. Ol Poto: James G. Kila



Komedien Alphonse Dirau husat ol i save kolim Kanage i sanap wantaim wanpela fen bilong em i sanap fran long Tumbuna TV stol.

James G. Kila i raitim

MADANG provins i wokim histori pinis long PNG bikos em i go pas long gat wanpela provinsal televisin stesen bilong en yet ol i kolim Tumbuna TV.

Dispela televisin stesen i save telekasim o autim ol program bilong en long Madang yusim ol kebol na signal we lokal kebol TV kampani, Raycom, i hukimap long bringim wailes i go long haus bilong ol manmeri long Madang we ol i ken amamas long lukim ol muvi piksa na kisim infomesen.

Tupela wik i go pinis, Tumbuna TV i bin stap long Divain Wod Yunivesiti (DWU) Open De we I bin lukim tu biknem fani man o komedien Kanage i bin stap. Kanage i holim megafon na mekim save long promotim Tumbuna TV, na i tokaut stret olsem Tumbuna em namba wan provinsal TV stesen long Papua Niugini.

Nem tru bilong dispela pani man Kanage em Alphonse Dirau na bagaros yet em bilong Mikarep long Bogia distrik long Madang provins.

Long Sande, Me 1, Kanage i bin stap long stol bilong Tumbuna TV long promotim dispela nupela provinsal televisin stesen long ol manmeri husat i go raun long DWU Open De.

Em trupela tok olsem Tumbuna TV em i namba wan provinsal televisin long PNG we i save bringim nius na ol program long givim infomesin na toksave long ol pipel bilong Madang.

Menesing Dairekta o man i go pas long kirapim Tumbuna TV em Chris Seeto, husat i gat bikpela hanmak long PNG long promotim Madang musik taim em i ranim Tumbuna Trek Studio (TTS). TTS wantaim Chris Seeto tasol i save promotim Madang musik long 1980s na 1990s i kam wantaim ol biknem grup bilong Madang olsem Kales, Old Dog & Offbeats, Demas Saul, Wali Hits, Gedix Atege, Wass Kadoi, Malahiffs na ol arapela musik atis bilong Madang.

Kanage i bin soim kain kain stail bilong em long toktok na mekim pani na sanap long promotim Tumbuna TV long Sande, Me 1 long DWU Open De.

Planti ol lain bilong arapela provins husat i save lukim em tasol long TV komesal bilong Lae Bisket i amamas long lukim stret Kanage laip wan long DWU Open De long stol bilong Tumbuna TV.

Kanage tu i amamas long go bek long asples bilong em long Madang provins na promotim Tumbuna TV we i asples televisin stesen bilong Madang stret, na I kirap long Madang long promotim midia indastri.



FOE ASSOCIATION INCORPORATED

(A mouthpiece of the Upper and Lower Foe People of Kutubu)

CONDOLENCE MESSAGE



Late Hon. Anderson Pawa Agiru

On Behalf of the Foe Association, the 139 ILG's of Foe, the Yawari Family, Gesege Village, and the people of Kutubu, I would like to pass my deepest sympathies to the immediate family, relatives and the people of Hela and Southern Highlands Province on the passing of the Hela Governor, the late Honorable Anderson Pawa Agiru.

Hela and SHP are in deep mourning in losing another great and visionary leader. First Nipa Dick Mone, then my father Late Hami Yawari and now Late Anderson Agiru. Words cannot express the deep sadness we all feel today. Late Agiru has left a vacuum that is irreplaceable. It will take years to find another Agiru in Hela, SHP and PNG.


As a young leader, I looked up to the late Agiru as my role model and mentor after the passing of my late father. Despite his political differences with Late Yawari, this great man supported my family and my people in our time of need. He stood by me and encouraged me to step up and lead my people. Late Agiru made a huge impact in my life and I will be forever grateful for I am where I am because of his support.

Late Agiru as former Governor of Southern Highlands Province and as PRK Director spearheaded many impact projects and Investments which are now directly benefiting the people of Foe, Kutubu and SHP through PRK and now the recent PNG LNG Gas project benefits. His Legacy will live on far and wide. My Leader, Governor, Mentor, Sere Memo Erarege, I Salute You!

May Your Soul Rest in Eternal Peace

Johnny Yawari
Chairman - Foe Association Inc &
Director - Petroleum Resources Kutubu

Em nau! Ol pikinini i ken painim rot i go long ples wantaim Wantok lain...



STORI BILONG TUMBUNA

Diwai karuka Dumun

LONG bipo, bipo tru long taim bilong tumbuna, long wanpela ples insait long Simbu Distrik ol i kolim Sina Sina i gat wanpela lapun man i stap. Em i gat meri wantaim tupela pikinini. Wanpela I boi na narapela i meri. Nem bilong boi em Dumun na meri em Okenel.

Long wanpela taim, sik mun i kisim Okenel. Olsem na Okenel i stap insait long haus tasol, na i go ausait inap tupela o tripela wik.

Long pasin bilong tumbuna, meri i kisim sik mun i stap olsem na taim em i laik i kam ausait ol papamama na lain bilong em I mas kukim kaikai na wokim liklik pati bilong meri.

Tu, taim meri i kam aut o sik mun bilong em i pinis, em i ken i go na stat singsing na slip wantaim yangpela boi long haus meri.

Olsem na taim brata bilong em Dumun i harim dipela tok em i kisim banara wantaim spia bilong em wantaim sampela nupela kaukau na i stat long wokabaut i go long bikbus long taim ol pipel kukim kaikai bilong susa bilong em.

Bihain long wanpela bikpela maunten klostu long bikbus, na taim em i lukim olsem bai tudak, em i stat long brukim paiawut bilong kukim kaukau bilong em.

Taim em i brukim han bilong wanpela diwai, wanpela samting i pairap na ai bilong Dumun i raun na em i pundaun long graun hap indai.

Bihain em i harim olsem nek bilong man na em i kirap isi isi na lukim wanpela naispela meri tru em i no save lukim insait long Sina Sina.

Nau meri hia i askim Dumun long karim bilum kaukau bilong em. Tasol Dumun i no laik.

Tasol tewelmeri i wok long askim em yet, olsem na Dumun i pret na em i karim bilum i go.

Tasol taim tupela i wokabaut, tewelmeri i wok long tromoi kaukau wan wan i go long bikbus. Na taim bihain, em i askim Dumun long karim banara wantaim spia.

Taim Dumun i larim em i karim, tewelmeri hia em tromoi i go long bikbus. Dumun i kros nogut tru, tasol em i no save meri i kam we olsem na tupela i go insait moa long bikbus.

Klostu i laik nait, tupela i kamap long kain diwai mipela i kolim karuka. Karuka hia I narapela kain i gat longpela stik bilong em na i gat strongpela pikinini tu. Na long as bilong diwai hia, i gat gutpela pikinini prut long en.

Tewel meri hia i tokim Dumun long kisim tupela prut.

Na taim em i brukim, diwai i pundaun na i op na tupela i wokabaut i go insait. Nau tupela i stat kaikai ol kaikai tewel meri i bin kukim pinis. Tupela i bin stap long diwai hia em i ples bilong tewelmeri inap sampela mun.

Na long ples bilong Dumun, susa bilong em i kamaut pinis i lus tingting pinis long Dumun.

Long wanpela moning, boi na tewelmeri i kamap long ples bilong Dumun. Ol manmeri na pikinini i lukim Dumun na kirap nogut tru. Ol i ting em i dai pinis. Olgeta man, meri na pikinini insait long ples i kaikai pik.

Tasol tupela i no bilip long wanpela sanguma meri. Olsem na sanguma meri hia I wok long lukluk strong tru long tewelmeri. Na tewelmeri ya I lukim em, na taim em i laik katim sampela pik, em katim han bilong en. Tewelmeri hia i guria na pret wantaim, olsem na em i katim na popaia long katim pik. Em i katim pinga long han bilong em, na blut i ran olsem wara stret.

Nau tewelmeri ya I sanap tingting tumas na tingting bilong em i paul tru. Na em i stat long ran i go pas, tasol Dumun i sori nogut tru na i wok long bihainim blut na ran i go bihain.

Taim Dumun i kamap bek long ples, em i tokim ol man long ples. Nau ol i kolim abus long tok ples "Noko." Min olsem, ol man i no save meri i kam long wanem ples. Na wanpela diwai Karuka ol i kolim Dumun.

Na tu long dispela ples long wanpela taim, i gat planti long ol dispela Karuka Dumun. Olsem na tu, tude i gat wanpela ples insait long dispela liklik ples nem bilong em Dumun.

Yogomul Gaima


PAINIM WOD PILAI

Ol wod lista:

- | | | |
|------------------|-----------------|----------------|
| DAUNPASIN | KALANGAR | NOGUTIM |
| DUKDUK | KIBUNG | OLAMAN |
| FRAN | LEPAMAN | PAIAMAN |
| GORGOR | LIKLIK | PLANG |
| HELIKOPTA | MAKIM | RITIM |
| ILEKTIM | MASALAI | SANAP |
| JIP | NAPKIN | SMOKIM |

G Q V H E Z H P A T I K N U J I P Q D G X G Q J D
 E B R N S T T H I F O O E L F N A F C U V R W N R
 S G D C L U J B J C E S A K S E U G P E E S C G T
 L W I F Y A I S A F N H W Y F A N I L H M R R S I
 O I P H O X L S S I S A I G L A S A I I G A W D L
 E N X O F E A W K P B I M X L R T G K K M H D H E
 L S F A R M R P N B Z E Z P C P I A L C S R S E G
 X O D R A O A R L T A A L Q O S M J I P E K S O L
 N G O M N N R J M G B N E K E T N T K F T D E D E
 Q O A R D C D Q B I V R I Z A R T R I A N N D I M
 D T Y R A L N B U H L L G S C L O O B P E P E E H
 D U K D U K D N N R E E A A I I A A U S H N C P D
 Z N G S N S A T G H P R K G O M N N N S Q O B R Z
 S G O T P M O X I E A A E T J P A W G R M F F J U
 R S R J A W Z H M B M A I A I H P S F A L G I I Y
 D T G L S L P I O S A O H A X M E R A L R I T I M
 E O O T I A K Q U I N M N F M P F A X L S V X V F
 M P R F N O G U T I M D E A E A I W G H A O T A U
 E F S A M X R H B M L J F L S D N R S R T I S E P
 H T S S X I C B I B S G N I H V Q R J R R U T R F

Ansa bilong Wod Pilai isu 2173





TOK PISIN NEWS

from Radio Australia
radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service
6am - 7am 6080; 7240(KHZ)
7pm - 9pm 5995; 6020; 9710; 1280(KHZ)

OI UPNG sumatin i mas go bek long skul: Minista Tabar i tok

Caroline Tiriman na Sam Seke i raitim

MINISTA bilong Haia Edukesen long Papua New Guinea, Malakai Tabar, i tok em i no wanbel wantaim ol sumatin long ol i no givim em petisen bilong ol.

Minista Tabar i tokim pinis ol sumatin bilong YUnivesiti bilong PNG olsem em ol i mas go bek long skul, o sapos nogat, orait ol i mas lusim skul na go bek long ples.

Minista Tabar i mekim dispela toktok bihain long ol sumatin i no bin laik givim petisen we ol i laikim Praim Minista, Peter O'Neill, long lusim wok bilong en.

Praim Minista O'Neill i wok long bungim planti kros long ol hevi em i kamapim, olsem em i bin oraitim \$1.2

bilien dola lon o dinau mani i kam long UBS Bank bilong Switzerland em kantri nau i painim hat long bekim.

Ol dispela sumatin i tok ol i laikim tru Praim Minista long go kisim dispela petisen bilong ol long yunivesiti.

Tasol Mista Tabar i tokim Radio Australia olsem em i sanap makim Praim Minista long kisim dispea petisen, na taim ol sumatin i no wanbel, orait ol i mas lusim skul.

Long wankain taim, ol sumatin long Yuniversiti bilong Papua New Guinea i tok ol i sanap strong long diman o askim bilong ol long Praim Minista Peter O'Neill i mas aut long opis, na larim ol polis i askim em long ol tokwin long korapsan.

Ol i laikim tu Polis Ko9misina, Gari Baki, long

putim bek gen het bilong Fraud na Anti-Corruption Dairektoret, Mathew Damaru we em i bin saspensim wantaim deputi bilong en.

Ol sumatin i no bin go long klas, na i wok long dimandim Praim Minista O'Neill yet i go kisim petiean wantaim dimand bilong ol.

UPNG Forum Siaman, Christopher Kipalan i tok, askin ol sumatin bilong UPNG na tu ol bilong Unitech long Lae i wokim em makim krai bilong olgeta pipol bilong Papua New Guinea.

Mr Kipalan i tok olketa institusan bilong gavman long kantri i lusim paua bilong ol long ol kain wok Mr O'Neill i wokim long em i no go long kot.

Vanuatu Intarneseonal ples balus wok i pinis

Caroline Tiriman i raitim

OL Gavman na turis bisnis lain long Vanuatu nau i amamas long ol wok long stretim Epot nau i pinis na ol i redi long lukim planti turis bilong Australia na New Zealand i go bek na raun long Vanuatu.

Ol Gavman na turis bisnis lain long Vanuatu i bin stap long wanpela bung o seremoni long dispela wik long Bauerfield intanesenel epot o ples balus klostu long Port Vila bilong makim pinis bilong ol wok long stretim gut ranwe long dispela epot.

Ol balus kampani bilong Australia olsem Virgin Australia na Air New Zealand i bin stopim ol ran bilong ol i go long Vanuatu long stat bilong dispela yia long wanem, ol i

bin tok olsem Epot ya i no bin safe long ol i yusim.

Qantas tu i bin stopim ol wokbung wantaim Air Vanuatu.

Mista Koanapo i tok tu olsem Virgin Australia bai statim ol ran bilong en i go bek long Vanuatu long namba 23 bilong dispela mun.

Tude tu Iririki Ailan Risot long Port Vila bai opim dua gen bihain long Saiklon Pam i bin bagarapim long 2015.

Palamenter Seketeri bilong opis bilong prsaim minista, na memba bilong Tanna long Nesenel Palamen, Johnny Koanapo, i tokim Radio Australia olsem Gavman na Turisem Industri i hamamas olsem Bauerfield Intanesenel Epot nau i redi long kisim ol Intanesenel ran bilong balus o flait.

PNG na Pasifik At long Australia

Caroline Tiriman i raitim

ASISTEN Kureta bilong Indijinis na Oseanik At long National Gallery bilong Victoria, Sana Balai, i tok wok bilong lukautim ol stori, ol kaving na At bilong ol kantri long Pacifik emi wanpela bikpela samting.

Mista Balaidispela em long lukautim gut ol samting bilong ol pipel long bihain taim.

Mista Balai i mekim dispela toktok bihain long ol i bin lonsim wanpela nupela buk ol i kol im War Trophies or Curios? long Mu-

seum Victoria long dispela wik.

Dispela buk i lukluk long ol kaving na ol narapla samting bilong ol tumbuna bilong Papua New Guinea em ol soldia bilong Australia i bin kisim long PNG long Wol Woa 1.

Museum Victoria igat wanpla hap oa section emi save soim ol carving na Art bilong Pacific, wantem tu Papua New Guinea na planti long ol dispela samting emi olpla tru.

Planti taem ol Museum long Australia i no save soim ol artwok bilong PNG na Pacific.

Askim long UN i sapotim Wes Papua Indipendens vot



Wanpela protes agensim rul bilong Indonesia long Wes Papua

Sam Seke i raitim

WANPELA miting long London dispela wik bilong ol international parliamentarian we i sapotim Free West Papua movement, i wanbel long askim United Nations long sapotim wanpela vout long independence. West Papua independence

lida husat i stap long London, Benny Wenda i tok, United Nations i bin rong pinis long luksave long dispela 1969 vout we i lukim Indonesia i kontrol im West Papua.

Em i tok miting ia wanbel olsem, i taim nau long United Nations i stretim dispela rong na karim aut wanpela vout long ol pipol bilong West

Papua yet i disaed long fiutsa bilong ol.

Sampela memba bilong palamen, ol tok gavman representativ, ol loaia na save man long United Kingdom yet, long arapela hap long wol na Pacific inkludim Papua New Guinea, Solomon Islands na Vanuatu tu i stap long miting ia.

Aust Wes Papua sapot

Caroline Tiriman i raitim

OL pipel bilong Cairns long Far Not Queensland i bung long sapotim International Parliamentarians for Wes Papua miting long London.

Tude bikpela miting bilong International Parliamentarians for Wes Papua (IPWP) i bin kamap long Westminster o Palamen Haus bilong United Kingdom long London we ol i bin lukluk long ol wari na laik bilong ol pipel bilong Wes Papua long kisim Fridom.

Dispela miting i bin stat aste na i bin pinis tude.

Ol dispela memba bilong Palamen i sanap makim planti kantri long wol husat i bin sainim wanpela dklarsen we ol i luksave olsem ol pipel bilong Wes Papua i gat rait long lukautim ol yet.

Planti tausen pipel i bin mas long ol rot bilong Jayapura, biktaun bilong Wes Papua, bilong sapotim dispela miting long London, tasol ol polis na sekuriti opisa bilong Indonesia i bin paitim ol na pulim kalabusim planti long ol.



Ol West Papua sumatin i mas na toktok strong long kisim independens. Foto: ABC

Sampela memba bilong Australia palamen tu i sapotim dispela International Parliamentarians for West Papua.

Long dispela wik, ol memba bilong Cairns long Far Not Queensland long Queensland stet Palamen i bin go pas long wanpela bung long Cairns bilong soim sapot i go long ol pipel bilong wes Papua long lukautim ol yet na noken stap moa aninit long lukaut bilong Indonesia. Indonesia i bin kisim nat-

ing Wes Papua we ol i save kol im Wes Irian long 1969 aninit long wanpela vot o referendum em ol i bin kolim long Act of Free Choice. Tasol ol pipel bilong Wes Papua i save kolim dispela kalen vot olsem Act of No Choice.

Nau ol i tok moa long 500,000 pipel i dai pinis long han bilong ol militeri bilong Indonesia husat i save laik stopim ol Melanesian pipel long go het wantaim Pait bilong ol long kisim fridom.

Stopim ol kar i yusim rot

PLANTI tausen pipel i amamas long gavman bilong Paris, Frans i tambu long ol kar i ran long Champs Elysee rot long wanpela Sande insait long wanpela mun. Dispela tambu i givim sans long ol pipel i wokabaut raun isi long ol stua na ples kaikai long dispela hap. Champs Elysee em i gat 8-pela lein bikrot na em i wanpela bikpela hanmak ples long lukim long Paris na oltaim ol rot i save pulap tru long ol kar na manmeri.

Dispela nupela lo i tok, long namba wan Sande bilong mun, bai i tambu long ol kar i ran long dispela hap. Em i aidia bilong meya Anne Hidalgo na em i putim tambu long stopim moa polusen ol kar i save kamapim. Ol turis na pablik i amamas tru na i sapotim dispela aidia bikos ol inap long wokabaut isi long dispela 2 kilomita rot i go kamap long Arc de Triomphe na i no wari long ol kar i pasim ples na kamapim planti smok.



Dispela de bilong tambu long ol kar, em i wanpela rot ol atoriti long Paris i yusim long stopim polusen.

US pasindia sip i go long Cuba

WANPELA pasindia sip bilong Amerika i lusim ples na go nau long Cuba. Dispela bai namba wan taim bihain long 50 yia, long wanpela sip bilong Amerika i raun i go long Cuba.

Dispela sip, Adonia, i karim 700 pasindia na em i lusim Miami na i go nau long Cuba. Ol i tok bai em i kamap long Cuba long Mande.

Las yia, Cuba na Amerika i stretim tok long wok wantaim gen. Tasol i gat sampela tambu long tred na tok orait long ol pipel i raun namel long tupela kantri, i stap yet. Dispela pasindia sip i go long Cuba bihain long Cuba i tok orait long pinisim tambu we i tok ol sitisen bilong en i no inap long lusim o kam insait long kantri long solwara.

Kampani bilong Amerika husat i opereta bilong dispela pasindia sip i kisim tok orait long gavman bilong Cuba na Amerika long ol sip bilong en i ran namel long tupela kantri.

Wanpela lo bilong gavman bilong Cuba i tok ol sitisen bilong en i mas lusim o kam insait long kantri long balus tasol. Bikos long dispela tambu, kampani i no inap long kisim ol buking ol long siitisen bilong Amerika husat i bin kam long Cuba. I bin gat planti protes i kamap olsem na Cuba i givim tok orait na larim ol pasindia i kalap long dispela sip na raun i go long Cuba.

Bipo long revolusen i kamap long Cuba na Fidel Castro i kamap presiden long 1959, ol pasindia bot na ol bikpela sip i save raun i go kam namel long Cuba na Amerika.

Bihain long Presiden Barack Obama na Raul Castro i tokaut long Desemba 14 long wok bung gen, planti turis i wok long go long Cuba nau.

Ol pasindia sip bai bringim moa turis i go long dispela ailan. Adonia bai ran namel long Miami na Cuba olgeta potnait.



Planti tausen turis i save go long sip long Cuba, tasol i tambu long ol sip i kam olsem long USA.

Bolivia i sutim tok long Chile

PRESIDEN bilong Bolivia, Evo Morales i sutim tok long Chile na tok Chile i laik kirapim trabel olsem na i sanapim wanpela ami bes klostu long boda bilong tupela kantri.

Mista Morales i tok dispela bes i stap 15 kilomita long boda na em i mak bilong birua pasin Chile i mekim.

Chile i strongim ol militeri patrol long boda wantaim Bolivia tasol em i tok ol i no mekim dispela long soim birua pasin long Chile.

Foren Minista bilong ol i tok, 'I no gat militeri bes long boda. Mipela i putim moa patrol long boda long stopim ol trabelman i bagarapim ol pipel na stopim ol drag i kam olsem long Bolivia.'

Dispela ripot i tok Chile i gat wanpela militeri bes tasol long wara Silala, wan mail longwe long boda wantaim Bolivia.

Chile i tok Bolivia i mas tokaut long watpo em i gat pemanen ami bes long boda.

Ol tupela kantri i save kros oltaim long wara Silala. Dispela wara i kamap long ol maunten long Bolivia na i go



Presiden Morales i tok intenesenel lo i tambu long sanapim militeri bes 50 kilomita long boda bilong kantri.

daun long Andes na kamap long Chile.

Presiden Morales i tok Bolivia bai kotim Chile long Intenesenel Kot ov Jastis (ICJ) long dispela wara.

Bolivia i tok em i papa bilong wara Silala long boda rijon na Chile i no baim kompensesen long taim em i yusim dispela wara. Tasol Chile i tok em i intenesenel wara na ol i ken yusim tu.

Chile i yusim dispela wara long maining operesen long Atacama deset. Chile i bikpela kantri long wol long

kopa maining.

Bolivia i bin kotim Chile long ICI long larim em i go olsem long Pasifik Osen.

Bolivia na Chile i save kros oltaim long graun. Long 2013 Bolivia i bin kotim Chile long dispela samting na ol i wet yet long kot i givim bekim bilong en. Moa long 200 yia i go pinis, Bolivia i bin lusim 400 kilomita nambis i go long Chile na nau ol i no gat rot long go kamap long nambis olsem na ol i kisim dispela hevi i go long ICJ long skelim.

Kenya i kukim ol tit bilong elefen

PRESIDIEN Uhuru Kenyatta bilong Kenya i laitim paia long bikpela hip tit bilong ol elefen long soim olsem kantri bilong em i promis long lukautim laip bilong ol elefen.

Ol i bungim moa long 100 ton tit bilong ol elefen long Nairobi Nesenel Pak na ol i kukim. Paia bilong ol dispela hip tit, i lait inap planti de long kukim ol dispela tit.

Gavman bilong Kenya i tok ol dispela tit bilong elefen i kam long 6,700 elefen em ol stilman i bin kilim ol elefen na kisim. Tasol

sampela lain i tok, maski ol i kukim ol dispela aivori, ol stilman bai hait yet na kilim ol elefen.

Bipo long em i laitim paia, Presiden Kenyatta i tok, mak bilong ol dispela hip i soim olsem Kenya i promis long lukautim ol elefen.

Em i tok, 'No gat wanpela man i gat bisnis long stap insait long bisnis bilong salim ol tit bilong elefen. Dispela bisnis i bilong kilim indai ol elefen na ol enimal bilong yumi.'



Dispela paia bai lait inap planti de, ol ripot i tok.

REL wok lain long Madang luksave long pristat miting

James G. Kila i raitim

OL WOKMAN MERI mas oltaim lukluk gut pastaim na painimaut wanem birua i stap long wokples pastaim long wok i stat.

Dispela em strongpela skul toktok we i save kamap oltaim long pristat miting bilong ol haus kuk na graun kru bilong Raibus Enjiniaring Limited (REL), wanpela lenona kampani husat i save wok kontrak wantaim Ramu NiCo Menesmen (MCC) Limited long operesen bilong en long Madang taun.

Ol wok kain bilong REL i save helpim Ramu NiCo long redim kaikai bilong ol wokman i go stap long Madang Inn na tu long Madang operesen bes bilong kampani long Madang taun.

Ol graun kru bilong REL em ol hatwok lain bilong katim gras, klinim ples na wok insait long Madang Bes bilong Ramu NiCo, na em ol trupela lain long mekim ples luk nais na ol ofis lain I save go wokim wok.

Long las wik Fonde, ol lain REL wokman meri long Madang Bes i go insait long pristat miting bilong ol long luksave long sait long sefti na tu long ol i mas stap fit na klin oltaim pastaim long ol i wokim wok bilong ol.

Ramu NiCo Madang Bes hotel kitsen supavaisa, Xu Changyu i go pas long dispela pristat miting bihain Helt, Sefti na Enviromen (HSE) lo na regulesin bilong kampani.

Pristat miting em bikpela samting pastaim long wok i

mas stat olgeta de, na long nau yet ol lain wokman meri bilong REL long Madang bes bilong Ramu NiCo (MCC) i save wokim pri-stat miting olgeta de pastaim long wok.

Mista Xu i tok pristat miting long olgeta moning em long luksave olsem olgeta wokman meri i fit na helti long mekim wok. Moa long en tu, em long luksave olsem ol tuls na eria bilong wok em seif long mekim wok, na tu long kamapim gutpela wok insait long seif enviromen.

Ol dispela 18 wokman meri bilong REL bihain long pri stat miting olgeta de save sainim pepa o fom long soim olgeta ol i save gut na bihainim HSE lo na sefti regulesin bilong Ramu NiCo MCC na bai ripot long wanem birua ol i lukim.

Risev bisnis mas go bek long asples

OL liklik bisnis i mas go bek gen long han bilong ol asples manmeri, wanpela bisnisman long Jiwaka i tok.

Robert Mundi i tok dispela polisi bilong gavman long kirapim planti liklik SME bisnis bai no inap karim gutpela kaikai sapos gavman i no rausim ol ausait manmeri husat i kisim ples bilong ol asples manmeri na mekim bisnis long kantri bilong yumi.

"Rausim ol manmeri Saina husat i pulumapim olgeta liklik bisnis we ol asples manmeri inap long mekim.

"Ol liklik bisnis mas go bek gen long han bilong ol asples manmeri. Nau yet olgeta liklik bisnis long kantri bilong yumi i stap long han bilong ol Saina na arapela ol ausait manmeri," Mista Mundi i tok.

Las wik taim Praisim Minista Peter O'Neill i opim nupela brens bilong Nesenel Developmen Benk (NDB) long Mt Hagen, em i promis long larim 45, 000 manmeri PNG i gat bisnis long yia 2020.

Mista Mundi i tok dispela polisi bilong gavman na ting ting bilong Mista O'Neill bai no inap karim kaikai bikos i no gat bikpela kes flo o mani long ples.

"Prais bilong kopi i go daun pinis na no gat wanpela man o meri long ples i amamas long planim kopi na mekim kopi bisnis.

"Ol kopi fama i lukim olsem mani i no stap long kopi. Mani i nau stap klostu long taun na senta we ol wok manmeri i wok.

"Mani i stap long resturan na haus kai. Ol wok manmeri long taun na siti i wok long yusim mani long dispela.

"Tasol ol Saina i kisim ples bilong asples na ranim dispela bisnis. Lo i tok dispela kain ol liklik haus kai bisnis em bilong ol asples manmeri," Mista Mundi i tok.

Mista Mundi i gat liklik bisnis long nupela Jiwaka Provins na em i autim dispela toktok bikos em i lukim olsem Saina na arapela ol ausait manmeri i wok long kisim ples bilong asples manmeri PNG na mekim bisnis.

India manmeri bai kisim visa long ples balus

OL turis na bisnis manmeri bilong India i ken kisim visa long ples balus long Pot Mosbi sapos ol i laik kam raun long PNG long malolo o long bisnis raun.

Gavana Jeneral Gren Sif Sir Michael Ogio i bin tokim Presiden bilong India, H.E. Shri Pranab Mukherjee, olsem PNG i luksave pinis long pasin bilong India we India i larim ol manmeri PNG na Pasifik ailan long kisim visa long ples balus.

Taim ol manmeri long

PNG i hat long go daun long Australia bikos long visa tasol, India i kirapim dispela nupela polisi long larim ol manmeri PNG i kam insait fri long mekim bisnis, skul o go raun long malolo.

"Mipela i luksave long dispela pasin bilong India. Dispela i woim olsem India i laik mekim bisnis na kamapim wanpela strongpela poroman wantaim PNG.

"PNG bai larim ol manmeri India i kisim visa long ples balus. Sapos ol turis bilong India o bisnis manmeri

bilong India i laik kam raun long hia, ol bai kisim visa long Jacksons ples balus," Sir Michael i tok.

Presiden Mukherjee i luksave long dispela gutpela pasin. Em i tok dispela bai strongim poroman namel long tupela kantri na kamapim moa bisnis long kirap.

"Sans bilong mekim bisnis na kirapim tried na invesmen bai kirap namel long tupela kantri bilong yumi. Mi amamas long dispela agrimen," em i tok.



REL wok lain long Madang Bes bilong Ramu NiCo sanap long pristat miting las wik Fonde na harim toktok bilong Mista Xu. Foto: James G. Kila



Sampela ol man India husat i kam wantaim Presiden Mukherjee long Jackson's ples balus, Pot Mosbi.

"Friends"
"Kaibigan"
"Wantoks"

MANILA
k1,708*
◀ RETURN ▶
Call toll free 180 3444 for more information.

Air Niugini
www.airniugini.com.pg

*Ex Port Moresby. Conditions Apply.

Hela lida bai sapatim LNG projek

OL lida bilong Hela i tok ol bai no inap larim ol papagraun i pasim PNG LNG Projek sapos gavman i no givim mani na sampela benefit bilong ol.

Gavman na sampela ol investa i no ken pret bikos Memba bilong Koroba-Lake Kopiago, Philip Undialu, i mekim dispela toktok las wik bihain long sampela ol papagraun bilong PNG LNG Projek i bin askim gavman long givim olgeta mani na arapela ol projek i kam aninit long LNG agrimen.

Ol papagraun i bin tok ol bai larim bodi bilong leit Gavana bilong Hela, Anderson Agiru, i stap yet long Pot Mosbi, na ol bai no inap larim gavman i salim bodi tasol i kam sapos gavman i

no baim ol projek mani na arapela ol komitmen aninit long LNG agrimen.

Tasol ol lida bilong Hela i bin bung wantaim Paim Minista Peter O'Neill las wik na stretim dispela hevi.

Memba Unidialu i tok ol lida bilong Hela bai larim PNG LNG Projek i ran yet na ol bai no inap sapatim ol papagraun long stopim dispela projek.

"Mipela i luksave olsem dispela projek em i namba wan projek. Pipel bilong Hela bai kisim benefit long dispela projek.

"Kantri tu bai kisim benefit na mipela bai no inap stopim. Projek bai ran yet, na mipela bai stap wantaim kampani na gavman long larim no gat wanpela hevi

moa i kamap," Mista Undialu i tok.

Mista Undialu i tok leit Gavana Agiru i bin kamapim PNG LNG Projek long larim ol pipel bilong Hela na PNG i kisim benefit, na ol lida bai bihainim tingting bilong Agiru long larim driman bilong em i kamap tru.

Paim Minista O'Neill i tok gavman i givim sampela mani pinis na i wok long givim aut kontrak long staitim sampela ol bikpela projek we leit Gavana Agiru i bin laikim mas kamap long LNG projek eria na insait long Hela.

"Gavman i putim aut pinis tenda bilong mekim rot long Mendi i go Tari, Tari i go Komo. Haus sik long Mendi na Tari i wok senis, na Menesing Dairekta bilong Oil Search i kamap bod siaman bilong Tari Haus sik," Mista O'Neill i tok.

Em i tok PNG LNG Projek em i wanpela namba wan na bikpela projek we bihain taim bilong Hela na PNG bai lukim planti gutpela samting i kamap long en.

Ol lenona lida long ges projek eria olong Hela i wanbel long toktok bilong ol lida wantaim Paim Minista O'Neill.

Ramu NiCo daunim namba bilong wokman

RAMU NiCo Menesmen (MCC) Ltd i stat pinis long daunim sais bilong ol wokman bilong en long tupela wok eria long Kurumbukari Main na Basamuk Rifaineri long Madang provins.

Dispela i kamap bihain long Mineral Risos Atoriti (MRA) i bin givim wanpela oda long stopim wok long go het long hai presa esid litsing (HPAL) plent bilong en long Basamuk Rifaineri. Olgeta wokman tu i stop wok long HPAL operesen eria.

MRA i bin givim oda long stopim wok long HPAL eria bihain long bikpela birua i bin kamap long Fraide, Epril 15 we i lukim wanpela wokman bilong Saina i lusim laip bilong em na narapela tupela wokman bilong PNG i kisim bagarap.

Presiden bilong Ramu NiCo Menesmen (MCC) Ltd, Wang Jicheng i tokaut long dispela las wiken taim em i givim edvais long rejista menesa long Basamuk Rifaineri na Kurumbukari Main long stat raitim leta i go long ol wokman olsem ol bai lukim senis i kamap long kontrak bilong ol.

"Ramu NiCo Menesmen i mas karimaut wok long skelim sais bilong wokman bilong en long lukim wok bisnis i go het insait long dispela taim nau saspensen i stap na dispela i min olsem mipela mas daunim sais bilong wokman," Mista Wang i tok.

Mista Wang i tok dispela ekasesais long daunim sais bilong ol wok lain bai stap insait long tripela eria. Dispela i min olsem sampela wokman bai stap yet na mekim wok we i mas lukim main i ran, sampela bai go long ples inap saspensen i pinis, na ol narapela lain em kampani bai pinisim ol olgeta long wok.

Kurumbukari Main Menesa, Sarimu Kanu, i bin bung wantaim ol main supavaisa na menesa long Mande, Me 2, na i tokaut klia

olsem Kampani i lusim bikpela mani tru insait long dispela taim we wol komoditi prais i pundaun i go daunילו, tasol kampani i holim ol wokman bilong en yet.

Tasol bihain long birua i bin kamap long Basamuk Rifaineri, we i lukim wanpela wokman bilong Saina i lusim laip bilong em. MRA i givim oda long wok i mas stop.

Dispela i givim bikpela hevi nau long kampani long lukautim olgeta wokman bilong en. Oda bilong MRA Mains Inspekta i askim Ramu NiCo long putim kamap namba tri pati em intanesenel lain bai givim wanpela ripot long wok painimaut i go insait long as tru bilong dispela birua, na rot long banisim kain birua long kamap gen long bihain taim.

Mista Kanu i tok HPAL em bikpela prodaksen eria bilong Basamuk Rifaineri operesen na dispela i givim hevi long olgeta seksen bilong prodaksen. Olsem na inap taim MRA i amamas long ripot bilong indipenden lain, bai wok i kirap gen.

Ramu NiCo long KBK Main na Basamuk Rifaineri i wok long glasim nau wok bilong ol wokman bilong en, taim ol i givim long wok na glasim wanem kain wok ol i wokim.

Mista Wang i tok olsem menesmen i luksave olsem dispela daunim sais bilong ol wokman bai givim bel-pen na hevi long ol wokman na famili bilong ol, tasol bikpela samting em Kampani i gat bikpela hevi tru long sait long mani olsem na ol i mas kamap wantaim dispela disisen.

Em i tok long nau yet, kampani i givim bikpela taim long stretim ol samting long sait long operesen i ken stat kwiktaitim. Olsem na kampani i nidim sapatim bilong olgeta lain insait long dispela taim nogut.

Kampani i no tokaut yet long hamas namba bilong ol wokman em bai rausim ol o larim ol i go stap malolo pastaim.

Prais go antap bikos rot bagarap

OL prais bilong kaikai na arapela samting bai go daun sapos gavman i kirapim gut na stretim ol trenspot infrastraksa long kantri bilong yumi.

Ol trenspot infrastraksa em ol rot na bris, sip bris na ples balus.

Propeti Menesa bilong Trukai Industris Limited (TIL) Paul Gware i tok ol rot na bris long Lae i bagarap na dispela em i wanpela samting we i wok long mekim prais bilong ol kaikai na ol arapela samting i go antap.

"Mipela bai no inap sasim prais bilong ol rais i go antap tasol sapos gavman i no stretim ol rot na bris long Lae, prais bai go antap,"

Mista Gware i tok.

Mista Gware i tok sampela rot insait long Lae siti i bagarap na gavman i no stretim dispela hariap.

Taim dispela kain bagarap i kamap, prais bilong ol samting i save go antap bikos ol kampani i laikim bisnis opresen bilong ol long ran gut taim rot i bagarap.

"Prais bilong ol kaikai na arapela ol samting bai go daun sapos gavman i stretim rot gut. Sapos gavman i no stretim gut, ol kampani bai apim wan toea o tu toea long prais," em i tok.

Mista Gware i tok rot i kam long Trukai olsem long Lae maket na sip bris i pulap long planti hul na ol i no putim

kolta long dispela hap rot.

"Planti hul i stap long rot. Ol samting bilong kar i kisim bagarap taim ol i kisim ol kago i kam long dispela no gut rot.

"Mipela i singaut long gavman long luksave long dispela kain samting na stretim ol rot hariap. Dispela bai no inap larim prais bilong ol samting i go antap," em i tok.

Mipela i ken mekim haidro, kampani tok

WANPELA kampani bilong Saina i tok em i ken kirapim Ramu 2 haidro pawa projek bikos em i gat mani na teknikel samting long pinisim dispela projek.

Liyuan Zhang bilong Sinohydro Corporation Limited i tok kampani bilong em i ken kirapim dispela haidro bikos ol i gat mani na save man long mekim dispela wok.

Em i mekim dispela toktok las wik Fraide long Pot Mosbi taim Kumul Consolidated Holding Limited (KCHL) i tokaut long wanpela tenda ol i bin putim long kirapim Ramu 2 haidro pawa projek.

"Mipela i gat wol klas save man na mani. Teknikel kapasiti bilong mipela i antap tumas. Mipela i bin kirapim dispela kain ol bikpela pro-



Ol Ramu NiCo Helt, Sefti na Envairomen opisa long KBK Main i sekim wok eria taim stop wok i kamap.

jek long sampela kantri tu na mi bilip mipela i ken mekim bihainim plen bilong KCHL long kirapim dispela projek," Mista Zhang i tok.

Mista Zhang i mekim dispela toktok las wik Fraide long Pot Mosbi taim KCHL i bin tokaut long wanpela projek tenda ol i bin putim aut long kirapim Ramu 2 Pawa projek.

Menesing Dairekta bilong KCHL, Garry Hersey, i tok 63 kampani i

bin resis long winim dispela projek long kirapim dispela bikpela haidro pawa projek long kantri tasol ol i bin kisim tripela tasol.

"Dispela tripela kampani bai mipela lukluk long fainensal na tenknikel kapasiti bilong ol. Tupela kampani i kam long Saina na namba tri long en i kam long Saut Korea," em i tok.

Mista Hersey i tok dispela haidro pawa projek long Ramu bai ki-

rapim 180 megawat pawa saplai.

"Dispela em i wanpela bikpela pawa projek long PNG we pawa saplai i kam long Ramu 2 haidro bai saplaim moa pawa i go long hailans grid," Mista Hersey i tok.

Em i tok dispela pawa projek bai saplaim pawa i go long sampela ol risos projek long Momase, kain olsem Wafi-Golpu gol maining projek long Morobe na Ramu NiCo projek long Madang.

Konsevesen lida bilong PNG winim 2016 Whitley Awod



Kuna Karau i holim Whitley Awod na sanap wantaim Prinses Anne, husat i bin givim em dispela awod.

KUNA Karau, wangepa wok-man bilong Tri Kengeru Konsevesen Program long PNG, i bin kisim Whitley Awod, we Prinses Anne, pikinini meri bilong Kwin Elizabeth i bin givim em long London las wik.

Dispela Whitley Awod em i wangepa bikpela intenesenel awod long luksave long ol lain i save lukautim ol samting bilong bus na solwara long ol i ken stap long-pela taim. Mista Karau i bin kisim luksave long lukautim ol tri kengeru.

Mani mak bilong dispela awok em i stap long £35,000 paun, long kisim projek fan we Prinses Anne i bin givim long Kuna long Royol Jiografikal Sosaiti, London long givim luksave long wok em i wokim long

mekim ol papagraun long save long lukautim YUS Konsevesen Eria long Papua Niugini we planti plethora i save stap na tu ol Matschies tri kengeru na ol pisin kumul.

YUS em i stap long Huon Peninsula na nem bilong em i kam long namba wan leta bilong tripela bikpela wara long dispela hap em, Yopno, Uruwa na Som. YUS eria i gat 1,500 skwea kilomita na em i save holim ol kain enimal na pisin we i dai pinis long ol narapela ples o nogat, namba bilong ol i go daun liklik tru. Em i wangepa bilong tripela bikpela ples bilong bikbus tru nau i stap yet long Wol. Em i stap longwe tru na i no gat rot long en olsem na ol man i ken go long lek tasol o nogat

ol i ken kisim spit bot o kanu na go long dispela hap.

Moa long 10-pela yia nau Karau na Tri Kengeru Konsevesen Program i bin wok wantaim ol pipel long ples husat i papa long dispela hap graun. Ol wok bung wantaim long kamapim ol plen bilong yusim ol risos we nau i stap long nesene polisi.

Wantaim dispela Whitley Awod, Karau bai kamapim sampela moa komyuniti plen long lukautim na mekim wok bilong konsevesen insait long hap bilong YUS i go inap long 2020. Presa i kam long loging na maining kampani i wok long bagarapim tumbuna kalsa bilong ol asples lain na dispela projek i wok long helpim ol long holim

yet ol gutpela netural samting bilong ol long bihain taim tumbuna lain bilong ol long kamap olsem lait long ol narapela komyuniti inap long lukim na bihainim.

Edward Whitley, man husat i kamapim Whitley Fan Fo Netsa, i tok, "Dispela Awod seremoni em i bilong luksave na selebretim wanem kain ol pait we ol man i winim na bungim wantaim, em i kamapim bikpela senis long nesene level. Antap long awod bilong mani, ol wina bilong mipela i kisim profesenal komyunikesen trening long tanim ol saientis i go kamap olsem ol embeseda, na ol i toktok long wanem samting ol i wok long mekim i go long ol pablik na ol lain bilong kamapim ol polisi."

Village Huts websait bai strongim turisem wok

VILLAGE Huts em i wangepa lokal edvensa na bekepa turisem opereta i bin kamapim wangepa nupela intanet websait bilong ol turis inap long bukim ol ples bilong slip na long bukim ol taim bilong raun lukluk long ol ples long kantri.

Dispela websait adres em, www.villagehuts.com today, we Australia i sapotim.

Wantaim nupela websait ol i ting olsem namba bilong ol turis long kam insait bai i go antap, na bai planti moa nupela hap bilong ol turis i lukluk raun bai kamap tu. Dispela bai bringim moa mani long ol pipel long ol lokal komyuniti we i stap long ol hap bilong ol bikpela turis eria.

Long taim ol i opim dispela websait, Australia Hai Komisen Kaunsela bilong Gavansens, Jodie McAllister i tok olsem dispela websait bai bringim ol nupela rot bilong ol turis long go long ol nais-

pela ol ples na ol pasin we Papua Niugini i gat long soim.

Village Huts i save wok long stretim ol ples slip bilong ol turis na ol narapela sevis bilong taim ol turis i stap raun long ol ples bilong turis save go long en insait long kantri. Sampela olsem 95 pesen o klostu olgeta ol haus long ples na ol ges haus i no gat websait bilong ol yet na ol i no gat we long soim ol samting ol i gat long salim.

Wantaim Maket Dvelopmenten Fasiliti, Australia i helpim Village Huts long mekim netwok bilong em i go bikpela moa long karamapim ol liklik haus long ples na ol ges haus na tu long ol narapela lain husat i save givim ol sevis long turisem bai stap tu long dispela netwok na bai pulim moa kastoma i kam, insait na tu ausait long kantri.

Long taim bilong opim, Village Huts Dairekta

Pamela Christie i bin tok: "I gat planti moa ples bilong slip i wok long kirap na planti wok tu i wok long kamap long ol turis husat i laik amamas na raun long ol ples, tasol i no gat we long putim ol ples klia na isi long lukim. Wangepa pletfom olsem bilong mipela i givim sans long ol turis long kisim ol kain gutpela sevis i stap insait long kantri."

"Ol edvensa turis husat i laik lukluk raun insait long PNG i save go long ol lain bilong ovasis long givim ol wanem kain prais i stap long ol turis ples. Dispela ol opereta i no planti na ol i no stap ples klia long internet olsem na turisem i no gro hariap long kantri," em i tok.

Mis McAllister i tok, "Australia i amamas long sapotim dispela nupela wok we i mekim ples slip na sevis bilong Turis i stap long internet insait long kantri yet.



Village Huts opereta i soim intanet websait i luk olsem wanem.

Groim flawa bisnis bilong PNG

Poto na stori
Anna Solomon

PAPUA Niugini inap long kamap wangepa kantri we flawa bisnis bai bringim mani i kam insait long kantri. Na sapos PNG i laik lukim dispela bisnis i gro, bai i mas gat ol flawa fama long ol provins husat i groim flawa bilong sapotim ekspot maket.

Janet Woyengu, bilong Nesene Egrikalsa Institut (NARI) i bin mekim dispela toktok long Namba 8 Florikalsa So long Pot Mosbi

long Trinde 4 Me.

Em i tromoi salens i go long ol meri long tingting long bihain taim bilong flawa bisnis na stat long lukluk long kamapim ol bikpela flawa fam.

Misis Woyengu i tok nau yet PNG i wok long lukim ol liklik flawa groa husat i planim flawa baksait na arere long haus bilong ol. Em i tok dispela i no inap long sapotim florikalsa indastri long kamap long PNG.

Em i tok, sapos ol fama i planim kakao o ol arapela kes krop, orait tingting tu

long givim wangepa hektagraun i go long planim ol flawa. Em i tok sapos yumi mekim olsem bai flawa bisnis inap long gro bikpela long kantri.

Em i sapotim toktok bilong Misis Cecilia Kagena bilong Dipatment bilong Egrikalsa, husat i tok PNG i laki long kisim blesing bilong Bikpela we yumi gat gutpela graun na klaimet na we yumi ken groim kain kain flawa. Misis Kagena i toktok tu long ol fama i mas lukluk long kamapim flawa bisnis long PNG.



Ol lida meri husat i bin stap long taim bilong opim Namba 8 Florikalsa So long Mosbi.

Leicester Siti i daunim Crystal Palace

Liklik klap, Leicester Siti, i daunim ol narapela bikpela klap na i kamap namba wan long Premia Lig resis.

Sampela taim, ol i save go insait long fainel bilong Europa Lig, olsem Fulham i mekim long 2010. Tasol, long maraton lig sisen, ol i no save pinisim top long Premia Lig inap nau ol i kamap namba wan.

Leicester Siti i kamap namba wan long Premia Lig we planti i no ting olsem ol bai mekim olsem. Ol i winim English Premia Lig na ol i mekim planti toktok olsem Leicester bai kamap bikpela klap nau.

Sempion na birua klap, Chelsea na Manchester Siti, i stat gut tasol tupela i lus, na Arsenal i winim mak na i ting olsem ol bai winim dispela taitel, tasol nogat.

Leicester i winim mak na dispela i karim kaikai long ol wanem kain driman ol i gat.

Leicester i bin winim sampela taitel bipo inap nau i kamap olsem namba wan bilong ol.

I gat ol bikpela klap bilong Inglan olsem Chelsea, Manchester Siti, Manchester Yunaitet, Arsenal na Liverpool i save gat planti spona na ol narapela klap olsem Leicester Siti i no gat dispela kain spona.

Leicester i no gat dispela kain mani long kisim ol bikpela skwat wantaim wol klas pilaia, na ol pilai na menesa i bin mekim narapela samting olgeta we ol i bin pilai futbol long stail bilong ol yet na i daunim presa long winim dispela gem.

Leicester i pilai dispela gem long 4-4-2 fomet long planti taim bilong dispela sisen. Banis bilong Leicester i kiamap strong na tupela

senta- bek pilaia, Wes Morgan na Robert Huth, i go pas long dispela wok taim sisen i go het.

Leicester i daunim ol bikpela man long asples bilong ol, tasol Leicester em i no wanpela liklik klap tasol pilai gut long dispela op-sisen, nogat. i gat narapela ol liklik klap i bin mekim olsem long bipo tu.

Menesa bilong Leicester i


amamas na go long pran bilong nius lain taim tim bilong em i kisim inap poin na i kwalifai long resis long Sempions Lig resis.

Taim ol i bin winim taitel, menesa bilong birua tim i no pilim amamas taim menesa bilong Leicester i amamas.

Menesa bilong Leicester i tok olsem tim bilong em bai kamap strong tumas long ol sisen i kam.



N'Golo Kante i pait long bal wantaim Wilfried Zaha.



Pilaia bilong Leicester, Shinji Okazaki, i skorim poin taim em i mekim wanpela ovahet kik gol egensim Nukestel



Ol sapota bilong Leicester i amamas bihain long tim bilong ol i winim Crystal Palace.

Siti daunim Kantri, 44-30



NSW Siti i amamas long ol i daunim ol NSW Kantri.

Nu Saut Wels Siti i daunim ol Nu Saut Wels Kantri, 44-30, taim Aaronn Gray i putim 4-pela trai bilong ol Siti long Tamworth.

Winga bilong ol Saut Sydney i go insait na i no bagarapim gem taim em i soim gutpela kala bilong em long ai bilong 8, 317 sapota long Scully Park pilai graun.

Tim Siti i kamap orait tu bikos ol tripela pilaia bilong Penrith Panthers, Bryce Cartwright, Josh Mansour na Tryone Peachey, i soim olgeta kala bilong ol long mekim Siti i win.

Tupela pilaia bilong Cronulla Sharks, James Maloney na Jack Bird, i go pas long ol Kantri na i putim bal long han bilong Boyd Cordner long skorim namba wan trai, 6-0, bilong ol Kantri na ol i stap pas.

Tasol, gem i senis gen na ol Siti i stap pas taim Ryan Matterson i stilim bal we Bird i pasim i go long trai lain bilong em na Gray i putim namba wan trai bilong ol Siti long wankain taim, taim Matterson i pas i go long em.

Bihain long dispela, pilai bilong Gray i kamap namba

wan tru we em i putim tupela trai na ol i go antap long 18-6 poin.

Ol Kantri i bekim traim bilong ol Siti wantaim foapela trai tasol Gray i putim namba foa trai bilong em na Matterson i putim wanpela trai i bringim skoa i kam antap long 30-30 long dispela taim.

Maloney i putim las tupela trai i bringim skoa bilong ol Siti i kam antap long 42-30 na wanpela las minit konvesen kik i bringim skoa bilong ol i kam antap long 44-30.

Ol meri Nu Silan i daunim ol Australia

OL Nu Silan Ferns i go het na daunim ol Australian Jillaroos wantaim 26-16 long ragbi lig tes bilong ol meri long Nukestel, Australia.

Tes resis bilong ol meri i bin kamap long wankain taim long tes resis bilong ol man long Fraide.

Kepten bilong ol Ferns, Sarino Fiso, na Winga, Atawhai Tupaea, i putim tupela tupela trai na faiv-eit bilong ol, Georgia Hale, i winim prais bilong ol pilaia i save pilai gut long taim bilong resis.

Skoa i bin sanap olsem 12-6 long taim bilong malolo na



Atawhai Tupaea i amamas long trai ol i putim egensim Australia.

Nu Silan i stap pas long dispela taim na winga bilong ol Australia, Karina Brown, i soim tru kala bilong em na i

putim tupela traim long namba tu hap, tasol ol Ferns tu i putim tupela trai na i daunim ol asples.

Kangroos i daunim ol Nu Silan, 16-0

AUSTRALIA Kangroos i daunim ol Nu Silan Kiwis, 16-0, long dour trans-Tasman ragbi lig Tes resis long Nukestel, Australia.

Trai we Darius Boyd na Greg Inglis i putim long namba wan hap i pasim win bilong ol Australia long Fraide nait na Cameron Smith i kisim planti penelti gol long namba tu hap i skruim poin bilong ol i go antap long 16-0 win.

Ol Kiwis i winim tripela resis egensim ol Australia wantaim Foa Nesens fainel, tasol ol i no winim dispela resis.

Ol i lus bikos faiv-eit bi-

han bilong hap-bek, Shaun Johnson, tasol. Dispela i mekim na Kiwis i no kisim wanpela poin.



Greg Inglis na Sam Thaiday i amamas long trai egensim ol Nu Silan Kiwis.

Ol stori na poto: ABC



GLASIM RAMU NiCo PROJEK



Wanpela Ramu NiCo, Wanpela Komuniti

Stat-gen bilong Ramu Projek wok bai bungim teknikol hevi

RAMU NiCo Menesmen (MCC) Limited nau i gat bikipela bel wari tru olsem taim projek i statim wok gen bai gat planti teknikol hevi i stap long ol bikipela masin bilong prodaksen wok. Dispela em sapos operesin i stop wok longpela taim.

Mineral Risoses Atoriti (MRA) Mains Inspekta i givim wanpela stop wok oda long Ramu NiCo long stopim wok long hai presa esid litsing operesen bilong en long Basamuk Rifaineri long Epril 15 bihain long wanpela wokman bilong China i bin dai long wok-ples na tupela arapela bilong PNG i bin kisim bagarap. Dispela birua i bin kamap long Epril 12.

Em klostu wanpela mun nau we i lukim wok operesen bilong Ramu NiCo Projek i stop wok bihainim stop wok oda em MRA i givim. Na nau yet no gat lain i save stret wanem taim bai wok i kirap gen bihain long indipenden ted pati lain i kari-maut wok painimaut bilong ol na ol wok stretim we bai kamap bihain long dispela.

Ramu NiCo Menesmen (MCC) Ltd long wanpela ripot bilong en i tok ol i stopim wok long Basamuk Rifaineri bihain long birua i bin kamap, na em i no taim stret bilong stopim ol olgeta bikipela masin long stap nating longpela taim tru olsem.

“Long teknikol sait bilong operesen, em bai hat tru long statim gen ol teknikol sistem lain bilong prodaksen masin taim em i stop wok longpela taim. Dispela em bikos i gat ol pipia graun we i stap insait long ol bikipela tenk, paip na ol arapela eria long HPAL we bai go strong tru na dispela bai hatwok

tru long rausim,” Ramu NiCo Menesmen i tok.

“Ol marasin o kemikol long miksim ol graun bihain long ol i stap longpela taim na no gat prodaksen i kamap long en bai kamapim hevi long ol bikipela paip na tenk, na dispela bai givim hevi long ol masin long kirap gen,” Ramu NiCo i tok.


Dispela HPAL wokples eria long Basamuk Rifaineri em wanpela bikipela hap insait long Ramu NiCo Prodaksin sistem we slari tritmen i save kamap, ol i save kukim ol graun long skelim ol mineral long go wan wan na esid litsing HPAL em eria we prodak bilong Ramu NiCo em ol save rifainim gut na salim i go long ovasis maket long bringim nupela mani i kam insait long PNG.

Kampani tu i wari olsem taim em i larim ol teknikol wokman bilong en olsem ol PNG lain na ol China wokman long go malolo, ol dispela lain wokman i ken go na painim wok long narapela kampani na dispela tu bai givim hevi tu long Ramu NiCo bihain.

“Taim mipela lusim planti ol teknikol wokman bilong mipela taim wok i stopnau em bai givim bikipela hevi tru long mipela bihain taim mipela laik statim wok gen,” Kampani i tok.

“Dispela sot-taim saspensin long operesen bilong Kampani bai givim planti hevi tru long Projek long nau na bihain taim.

“Fainensel posisen bilong Kampani bai painim hatpela taim stret na ol dinau bilong Kampani em i kisim long taim bilong Komisining bilong Projek i kam nau bai go antap na givim moa hevi gen long Kampani, “Ramu NiCo Menesmen i tokaut.



Ol HSE wok lain poin long KBK Main we em wok i stop nau.




Basamuk Rifaineri Esid Plent i stop wok.



Ol bikipela miksing tenk bai bungim hevi taim wok i stop longpela taim.



Bikipela KBK Main plent masin i stop.



135 KM Slurry Pipeline

KBK Mining

BSK Refinery

Kokin bilong UPNG i win

TUPELA Taekwondo paita husat i save makim PNG i bin pait long kisim namba wan ples long Taekwondo Korean Kap Tonamen long Karitas indo kompleks long Pot Mosbi.

Dispela tupela pait i kamap namel long Colland Kokin, bilong UPNG Taekwondo Klap, na Johnathan Pascalis, bilong Kassman Taekwondo Klap.

Long raun namba wan, Kokin i no givim wanpela sans long Pascalis taim em i apim lek bilong em na paitim Pascalis.

Kokin i stap pas long skoa lain wantaim 9-6 long raun namba wan.

Long raun namba tu, Pascalis i bekim birua bilong em na kikim Kokin na i kisim sampela skoa na i stap baksait we tupela poin i no bungim skoa bilong Kokin, na dispela i bringim em i kam bek long gem.

Tasol, Kokin i no laik daunim tingting bilong ol sapota bilong em na i blokim olgeta lek na han we Pascalis i tromoi na i nokim birua i go daun long floa na i bringim skoa i sanap olsem 16-14.

Sikspela tim i bin pilai long dispela tonamen wantaim 88 etlit man na etlit meri long ol wan wan grup.



Johnathan Pascalis bilong Kassman Taekwondo klap i putim blu vest na Colland bilong UPNG Taekwondo klap i putim ret vest.

Gurias i stap pas yet long Digicel Kap resis

AGMARK Rabaul Gurias i stap pas yet long lata bilong Digicel Kap resis bihain long raun namba foa long las wiken.

Gurias i skelim 8-pela poin wantaim Lae Snax Tigers tasol ol i stap namba wan long lata bikos ol i kisim ol poin long trai ol i putim.

Gurais i daunim Kemele Hela Wigmen, 13-10, long las wiken. Enga Mioks i stap namba 5 ples na i kam antap

long namba 3 ples long 5-pela poin bihain long em i stap sambai long raun namba foa resis long las wiken.

Waghi Timbe i daunim ol Bintangor Goroka Lahanis, 20-18, long asples bilong ol Wagi, Minj.

Eagles i stap namba faiv ples bihain long ol i daunim ol Pot Mosbi Vipers, 14-12.

Galp Isapeas i lus long namba wan taim bilong ol

na Lae Snax Tigers i win, 16-8. Isapeas i lusim namba tri ples long lata na i go antap gen long namba 6 ples.

Lahanis i stap namba 7 ples wantaim foapela poin, na Wigmen na Mendi Muruks i bihainim ol Goroka wantaim tri poin.

Vipers i stap long tupela poin na TNA Lions i stap sambai long putim wanpela mak long skoa bot.

Merifutbal program i go long Wewak pinis

WEWAK i gat bikpela sans we ol bai putim ol yangpela meri long futbal aninit long Merifutbal Program.

Long las wik Sarere, ol skul gel long Moem Praimeri Skul, St Marry's Praimeri Skul, Kreer Primary Skul, Kaindi Praimeri Skul na Mongniol Praimeri Skul i mas long Wewak pilai graun wantaim yunifom bilong ol long tokaut long dispela futbal resis.

Ol i givim ol su, soks, shin pad, yunifom na bal long ol wan wan skul husat i stap wantaim long taim bilong lonsing. Ol bai yusim ol dispela samting long Merifutbal resis bai kamap long ol wiken.

Jenerel Seketeri bilong PNG Futbal Asosiesen (PNGFA), Dimirit Mileng, Vais Presiden, Linda Wonuhali na Meya bilong Wewak taun, Charles Malenki, i stap wan-

taim long lukim ol i lonsim Merifutbal Program.

Mileng i tok tenkyu long Wewak Futbal Asosiesen na i tok olsem, ol i makim Wewak long Merifutbal Program bikos salens i kam long Futsal long makim PNG.

Em i salensim Wewak Futbal Asosiesen na i tok, nau bikpela wok i stap long han bilong menesmen long lukautim na mekim program i gro bikpela.

"Mipela i gat 3-pela yangpela meri bilong mipela long PNG anda 20 tim na tupela i kisim bagarap, tasol mipela bai strongim yet long groim ol," Dokta Kalinoe i tok.

Merifutbal program i lukluk long strongim ol yangpela meri husat i laik go het long driman bilong ol long futbal na ol bai resis long wan wan skul bilong ol.

PNG Kumuls i amamas long ol sapota



Ol Kumuls pilai i amamas wantaim ol sapota bihain long ol i daunim ol Fiji long asples bilong ol.

PNG LNG Kumuls i amamas long bikpela sapot ol lain PNG i givim ol na ol i win long las wik Sarere Tes pilai i kamap long asples bilong ol birua tim long Fiji.

PNG i redim ragbi Lig wantaim gutpela stori bilong ya bihain long ol i go long asples bilong ol Fiji na daunim ol, 24-22, long Pirtek Stediam.

Fiji i stap pas, 16-8 long taim bilong malolo, tasol ol PNG i ran i go pas long ol Fiji long namba tu hap.

Watson Boas i skoim tupela trai na na brata bilong em, Ase i kisim foapela poin long fil gol. Dispela i karim ol PNG i go sanap pas.

Fulbek bilong ol, David Mead, i soim gut kala bilong em. Tuepla trai i ken kamap long sait bilong ol Fiji tasol Mead i sanap strong na i stopim Brayden William, husat i ran strong long putim trai.

Tryone Philips, husat i spit rana bilong ol Fiji i ran inap 70 mita long putim trai, tasol em i no amamas taim fulbek bilong PNG i ranim em long baksait na takolim em klostu long trai lain bilong PNG.

Ol Kumuls i paslain bilong putim trai taim fulbek bilong ol Fiji, Tyrone Philips, i hat long holim Watson Boas,

husat i pundaun antap long bodi bilong ol man na i putim trai.

Ol trai i kamap bilong PNG em Watson Boas i putim tupela trai na Kato Ottio na Nene MacDonald i putim wan wan trai. Ase Boas i kikim foapela fil gol na i skruim skoa i go antap long 24.

Etuate Qionimacawa i putim tripela trai na Eloni Vunakece i putim wanpela trai. Sitiveni Moceidreke i kikim tupela fil gol i go insait na Maurice Kennedy i putim wanpela i go insait. Dispela i bungim skoa bilong Fiji i sanap olsem 22.

Lae Junia i amamas long namba tri de bilong Transhighway Kap



Ol opisal bilong Transhighway Kap i sanap long Sograun Oval long Lae

LAE Junia i isi tru winim ol Maunt Hagen na Madang long naba tri de bilong Transhighway Kap long Sograun Oval long Lae long las wik Fraide.

Long namba wan resis, Lae Junia i kisim 6/149 long 20 ova bilong ol egensim Mt Hagen.

Long namba tu resis long wankain taim, ol

Junia i salensim ol Madang na daunim ol tu.

Long fainel resis, ol Madang i daunim ol Mt Hagen wantaim 5-pela wicket.

Transhighway Kap em i 4-pela de kriket tonamen resis bilong ol man we 5-pela tim i save resis em long Hailans na Momase. Hailans tim em Mt Hagen na Goroka, na Momase tim em Lae Senia, Lae Junia na Madang.

Koiri i tokaut long top tri SP Spot Awod



Siaman bilong Seleksen Komiti bilong SP Spot Awod, Moses Koiri, i tokaut long top tri awod wina bilong wan wan grup.

SIAMAN bilong 2016 SP Spot Awod Seleksen Panel, Moses Koiri, i tokaut long tripela top fainelis bilong wan wan grup long Tunde.

Bihain long bikpela bekim i kam long ol pablik, seleksen panel i kisim 138 nominesen na ol i tokaut long ol top tri long wan wan grup;

Man etlit bilong yia:

- 1. Israel Eliab
- 2. Ryan Pini
- 3. Jack Viyufa

Meri etlit bilong yia:

- 1. Linda Pulsan
- 2. Abigail Tere Apisah
- 3. Toea Wisil

Tim bilong yia:

- 1. Tas tim bilong ol man
- 2. Futbol tim bilong ol meri
- 3. Va' a V12 tim bilong ol meri

Nesenel pefomens bilong yia:

- 1. Epari Souths bilong Pangia
- 2. Lae Siti Dwellers
- 3. Ephraim Larkin

Komyuniti Spots Inisietiv:

- 1. Ikwai pilai graun
- 2. Ni Ailan Triathlon Asosiesen
- 3. Sabama tas

Junia man etlit bilong yia:

- 1. Thadeus Katua
- 2. Maxemillion Kassman
- 3. Mathew Stubbings

Junia meri etlit bilong yia:

- 1. Violet Apisah
- 2. Rama Kumilgo
- 3. Lynette Vai

Namba wan spot lain wantaim disabiliti:

- 1. Haoda Agari
- 2. Vero Nime
- 3. Sent Anis

Spots Opisal bilong yia:

- 1. Jonathan Kassman
- 2. Barbara Stubbings
- 3. Elizabeth Wells

Spots midia bilong yia:

- 1. EMTV
 - 2015 Pasifik Gems TV kavarej
- 2. NBC
 - 2015 Pasifik Gems Redio kavarej
- 3. Fidelis Sukina

Spots poto bilong yia:

- 1. "For You PNG" - Mark Talia
 - Toea Wisil 100 mita pinis
- 2. "Taim bilong trai" - Mark Talia
 - Trai bilong ol Puk Puk
- 3. "Krai bilong amamas"
 - Mahalon Winston - Para etlit

Na tu, ol i tokaut long pablik olsem ol bai vot long Choice Awod bilong ol Pipel. Dispela em i namba tri yia bilong ol pablik long vot long husat ol ting olsem em bai winim Choice Awod bilong ol Pipel.

Awod bilong dispela yia em FM100 i amamas na sponsa.



Piksa i soim SP Spot Awod bilong Junia man etlit.



Deputi Seketeri Jenerel bilong Papua Niugini Olimpik Komiti, Andrew Lepani, i toktok long Choice Awod bilong ol Pipel.

Sistas i winim tupela gren fainel

YUNAITET Sistas i winim tupela gren fainel, 'A' na 'B' gret, wantaim long Pot Mosbi Softbal Sempionsip resis bilong ol meri long las wiken long Bisini pilai graun.

Ol 'B' gret bilong Sista i bin pilai egensim ol Yokomo na ol Sista i win wantaim 20-15 poin.

Gren fainel bilong ol 'A' gret i bin kamap bihain long belo na ol Yunaitet Sis-

tas i no givim wanpela rot na daunim ol wantaim 15-2 poin.

Pilaia husat i bin pilai gut long dispela resis em Nicole Mamia bilong ol Yunaitet Sistas. Mamia i kisim awot bilong ol pilaia i save pilai gut long resis long dispela taim.

Long dispela sisen gren fainel, Yunaitet Bratas na Sistas wantaim i go insait

long gren fainel resis bilong 'A' gret na 'B', tasol 'A' gret tim bilong ol man i lus long gren fainel.

Klap Seketeri bilong Yunaitet, Peter Watinga, i amamas long risal bilong klap bilong em na i tok, "Dispela sisen i kamap orait long sait bilong tim bilong mi na nau mipela i lukluk long resis wankain tasol long ol sisen kam."

LinkPNG

Call now for great value one way fares

Call toll free on 180 5465 visit www.airniugini.com.pg or email sales.linkpng@airniugini.com.pg for further information.



LinkPNG

A Subsidiary of Air Niugini





Pot Mosbi Ragbi Lig: Namba 12 bilong Helifix Warriors i holim bal na i laik salim i go long poro pilaia bilong em, namba 14. Ol birua pilaia bilong ol i putim blu siot i redi long takolim ol.



Makim gut na kik: Birua bilong ol Helifix Warriors i putim wanpela trai na dami bilong ol i kikim konvesen kik i go insait long gol. Warriors i lus na ol Birua tim i win, 14-10.



Trikim ol gut: Dami bilong ol Maunten Buls i putim ret na wait siot i abrusim wanpela pilaia bilong ol Yunaitet. Fowod na winga bilong ol Yunaitet i redi long takolim em tasol planti poro pilaia bilong ol Maunten Buls i sanap baksait long sapotim em.



Pinisim olgeta strong na ran: Peniel Richard bilong PNG etlit i ran strong long bungim nesene rekot bilong Mong Toval, 15.30 mita, long tripol jump bilong ol man long Lone Star Komprens Sempionsip resis i kamap long Stephenville Texas long las wiken.



Klia long rot: Olgeta pilaia bilong tupela birua tim wantaim i stap long baksait, bihain long ol i lus long skram pek na hevi fowod bilong ol Maunten Buls i kisim bal na i ran long bikpela rot i stap. Ol Maunten Buls i win wantaim 12 poin.



Yumi ol PNG yet: Ol PNG Etlit, (L-R), Theo Piniau i winim Silva Medal long 4x400 mita riley, Adrine Monagi i sanap wantaim gol medal, Rellie Kaputin i winim tupela gol medal na Peniel Richard i winim Silva medal.

PNG i namba wan: Adrine Monagi i winim gol medal long heptathlon. Em i sanap long namel wantaim tupela etlit husat ol i resi wantaim na i kamap namba tu na tri.





DIANA Tuna

*Niupela Swit Teist
Nau Igat Moa Oil!*



PNG's ORIGINAL TUNA

Manufactured by:
RD TUNA CANNERS LTD.

Richard i winim Nesenel Rekot



Peniel Richard i sam long tripol sam resis long Lone Star Konprens Sempionsip resis long Stephenville Texas. Peniel i winim wanpela silva medal bihain long em i kisim bikipela bagarap long Pole Vault resis.

PNG ETLIT, Peniel Richard, i winim Nesenel Rekot, 15.30 mita, bilong Mong Tavol long tripol sam resis bilong ol man long Lone Star Konprens Sempionsip resis i kamap long las wiken long Stephenville Texas.

Dispela mak Richard i winim em ol i lukim olsem em i winim ol narapela tu long dispela wiken resis.

Foapela PNG etlit i resis wantaim long tim Texan NCAA Divisen 2 Yunivesiti na planti etlit i winim bikipela mak bilong dispela yia.

Pasifik Gems Etletiks Tim Meneres, Sophia Marai, i tok olsem em i bikipela samting long lukim Peniel i kam bek bihain long em i kisim bikipela bagarap na em i no moa resis long ol pilai.

Ol i hapim Richard na kisim em i go aut long taim bilong Pole Vault resis bikos em i kisim bikipela bagarap we han bilong em i bruk i go tupela hap.

Nau, em i bin winim wanpela silva medal long tripol jump na em i gat inap strong long salens long hai sam gol resis bilong ol man.

Rellie Kaputin i soim gutpela kala bilong em tu long dispela Sempionsip resis we em i winim tupela gol

medal. Dispela i helpim tim bilong em, West Texas A&M, long winim namba wan Konprens taitel taim em i daunim Angelo State tim bilong Adrine Monagi.

Kaputin i soim gen bikipela strong bilong em long salens we em i winim long sam resis na dispela em i las sam bilong resis bihain long tim poro bilong em, Libby Strickland, i winim 6.09 mita wantaim namba wan sam bilong em na resis i go het long las raun.

Liklik win i kirap na dispela i helpim Kaputin long winim 6.13 mita.

Monagi i winim gol medal long heptatlon, tasol em i no winim nesenel rekot bilong lamo Launa, husat i putim 5037 poin.

Kosa bilong Monagi i pulim Monagi i go aut long heptathlon hai jump resis bihain long em i winim 1.60 mita, na tokim em long lusim sampela strong i stap bilong ol narapela resis. Fainel total bilong em i 5030 poin.

Theo Piniau i winim Silva silve medal long 4*400 riley na ol dispela 4-pela etlit em nau ol i lukluk long NCAA D2 Nesenel Sempionsip bai kamap long Florida bihain long tupela wik.



Taim yu senisim nepi bilong bebi bilong yu
Senisim long Sensi

Good Products, Better Prices, ikam long

Johnstons Pharmacies Ltd

P.O.Box 1066, Boroko, Papua New Guinea.

Tel +675 325 3185 Fax +675 325 0190 Email sales@johnstons.com.pg